

百件奇案大觀



上海世界書局出版



A541 212 0009 16668

百件奇案大觀

下編 風流審判案

審金釧奇案

紹興鄭某少游京師。學為銀工。性頗慧黠。所製務極新奇。一時京中良匠咸遜謝不逮。以故戚畹勳貴及諸縉紳家。所有閨閣釵飾。非出鄭手不貴。緣此鄭出入顯者之門。積貲數萬。鄭有妹名婉梅。素極友愛。年已及笄。姿首妍麗。幼字同里朱姓。朱以貧故。不能至京親迎。鄭又以事繁。不能送歸故里。會有中表弟某孝廉。公車北上。依鄭為居停。試畢。下第將歸。鄭為之置酒祖餞。且以銀錠一函。列於几上。向孝廉再拜致詞曰。僕有心事。思之數年。未得其人。今幸弟歸。此願可了。吾弟少年豪俊。且係至誠君子。倘蒙慨諾。乃敢畢其詞。孝廉見鄭情詞懇切。答曰。爾我至戚。情同骨肉。如力所能及。義何敢辭。鄭乃



以婉梅相託。並述遺嫁之意。孝廉遂慨然允諾。既抵浙。孝廉留婉梅於家。小住數日。消吉送其于歸。朱某惟有老母在堂。婉梅嫁至朱家。翌日晨興。見朱與其母駢死廚下。大驚而呼。鄰舍畢集。覘驗母子死狀。互相駭詫。共鳴官訊。究某明府少年科甲。素以精刻自負。勸驗畢。先後拘婉梅並孝廉至。詢得同路回籍情事。乃拍案作色曰。此案不待問。固已瞭如指掌。以怨女曠夫。同行數千重。且皆少年美好。謂一路彼此防閑。歷數月之久。能始終作魯男子者。吾不信也。命穩婆驗婉梅。果非處女。某明府更形得意曰。何如。吾言固不謬也。立加嚴刑。二人不勝箠楚。祇得誣服。獄具論辟。時人亦同聲稱明府之神。且姍罵婉梅與孝廉。人面獸心。有負鄭某之托。死不足以蔽其辜。鄭在京聞之。懊悔莫名。亦以二人之非人類。罪有應得。轉念婉梅自幼相依。十餘年來。以禮自守。言笑跬步。不稍苟且。卽孝廉爲人。亦屬少年純謹。邊幅自修。何遽作此蔑禮犯法之事。因之疑信參半。不能自決。躊躇多日。決計旋里省墓。藉

值此事之迹耗。一日鄭至一典肆中。正與主人閒談。忽見店夥持金釧一股。請於主人曰。此釧製法精巧。因索質價甚昂。不敢自主。特請命以定去留。鄭從旁見釧。大爲驚異。謂典主曰。此乃吾妹于歸時贈嫁之物。今幸無意見之。則死者之冤可白矣。乃道其原委。請將質釧之人。用計拘留。自詣轄邑。鳴鼓伸冤。邑令飭役拘質釧者至。一鞠而服。先是鄭以朱家寒素。恐妹嫁去。難以治生。遂廣製金釧數事。約計千金。以作助粧之資。質釧者本京師劇賊。探知此事。沿途尾婉梅孝廉之後。直至浙江。于歸日。朱家以貧故。合卺成禮後。諸親友便各自辭歸。賊乘人衆時。預伏廚下。朱母至廚。料理什物。賊暗中突出。以刃揮而殪之。朱聞撲擊聲。自往燭之。賊又突出。刃之。遂將朱衣履更換。秉燭進房。以言給婉梅曰。聞汝兄贈嫁有金釧數事。製法精巧。何不出以相示。婉梅以爲己夫。乃盡將所有出而獻之。賊大喜。佯爲稱贊不已。又與同寢。共赴好夢。及天明。矚婉梅熟睡。盡携所有而遁。賊之所供如是。邑令以狀上大

府移知浙省。並以入告。朝廷震怒。除賊寸磔外。復將素以精刻自負之某明府。處決論抵。婉梅給予旌表建坊。孝廉子給蔭入監讀書。恩法兼施。存歿均感焉。

審銀針奇案

某縣令一日。因公出郭。途遇某大戶之喪。執紼者約數百人。幡幢鼓樂。儀彩甚都。舊例吉凶大故。雖上官亦須避讓。令因止於道周。以俟其進。靈輻已過。孝輿隨之。嬌泣嚶嚶。乃亡者之妻室也。忽值暴風。素帷爲風揭起。孝婦之衣。盡露於外。則見斬縗之下。別有紅裳。色甚新艷。令心頗疑訝。命役訪察。哭於輿者何人。及役覆命。謂某紳新逝。無他眷屬。輿中之人。實其妻某氏。令大疑。心知有異。呼羣役阻其前進。且命停櫬某寺。以候檢驗。乃亡者戚族。半係巨紳。聞之愕然。亟面令哀懇。至再。終不聽。惟正顏厲色曰。諸公與逝者。非同路人。詎忍其死。不以命耶。如不聽。予檢驗。予甯掛冠而歸。衆紳不得已。姑聽之。

私議曰。俟無實據。再當詰問。看此乳臭官。將何辭以對耶。令返署。告其封翁。封翁曰。此係巨家。不可玩視。倘驗而無傷。將如之何。必須先探本源。得有確證。案不難自破。然欲明此事之真相。非予親行不可。蓋封翁固浙中宿儒。兼工刀筆者也。於是易裝爲卜人。秘密出署。授令以策。翌日。令遂托疾。不出視事。諸紳聞而大粲。街頭巷尾。莫不資爲談助。遷延旬餘。一日。封翁涉迹郊外。無所棲身。正在田間小憩。忽有一人來。叱問之。封翁起與爲禮。詭稱異鄉失路。不能前進。其人信之。慨然留宿。廬甚湫隘。不足以容多人。相與絮談。以消長夜。封翁微以言挑之曰。今歲田禾豐茂。脫遇賢長官。可以無憂矣。其人忽歎曰。君言此。適足使我心戚。此間遭悍吏之虐久矣。幸今之邑宰。年少明察。能體貼小民之疾苦。但聞不久將去任矣。封翁又詰某紳家庭間事。其人躊躇久之。始曰。某紳者。卽我之佃主也。突聞其猝死。心頗疑之。其家人皆莫知其死由。惟一小童深悉之。我嘗往某紳家。小童私下告我。謂某紳之妻。貌美。

性蕩。夙與其內兄有染。明去暗來。已非一日。茲因內兄適逢斷絃。思欲謀斃其夫。常圓好夢。不意爲邑宰窺破。留屍候驗。紳之親族。堅執不可。邑宰又畏蕙不肯卽發。實則破棺出屍。不難。秦鏡立照也。封翁又細詰之。其人耳語數四。封翁乃鼓掌大笑。遂不再問下情。明晨作別而行。其人又叮囑勿言。封翁遄返內署。備向其子述之。令得父指。及午卽乘輿出署。傳精細仵作數人。隨往檢驗。且囑曰。予云視汝卽視之。慎毋有誤。仵作領命。既至某寺。諸紳咸集。均不以笑面相迎。令命啟櫬。而屍已臭腐不可近。其族多有泣下者。令亦弗恤。惟聽仵作如法細檢。迨至下部。令遽指曰。視之。仵作會意。應手而出。則銀針一支。約長三寸。血迹猶殷。隱伏於湯物之內。衆大譁。靡不匍伏稱謝。令笑曰。諸公何前倨而後卑也。至是衆皆請緝兇手。令曰。予已得之矣。因問某亦在否。衆皆曰在。令卽命役將其內兄執縛之。視其色如死灰。衆始恍然。悟令回署後。亟飛一火標。速捕小童與亡者之妻。未幾咸集。令乃當庭研訊。先以

嚴刑擬童。童懼。盡吐其實。蓋童故某之腹心。薦於亡者。以遂其私。婦因與之同謀者也。某日亡者飲於某家。大醉而歸。童扶掖入室。婦卽以革帶與童同縛之。然後自褪其褲。以銀針刺入陽物之中。亡者醉不能支。大吼而卒。童與婦始緩其縛。扶置榻上。而以暴疾赴告於人。童既鑿鑿供認。婦亦離以抵賴。遂皆伏罪。令大笑。命褫婦之麻衣。則紅裳宛在。諸紳在旁觀者。罔不髮指。令又詰婦何以穿此紅裳。則謂自夫亡後。深慮不祥。故時時密着於內。而不知此案之破。卽在此紅裳也。豈非天哉。

審玉瓶奇案

鴈門杜稼秋。世家子也。父官京秩數十年。俸金悉市骨董。藏古玉尤夥。及卒。稼秋年甫弱冠。不治家人生產。且性喜揮霍。廣交遊。客之覬覦其古器者。往往稱道其美。稼秋慨贈之。無吝色。娶妻美而賢。家事悉以委之。有僕周四者。素慧黠。其妻屢欲屏之。稼秋以其爲先世僕。留勿遣。稼秋有漢玉瓶一。因爲

父極愛之物。獨不贈客。一日忽失所在。稼秋大戚。無何見之於市上。某質肆詰所從來。知爲周四所竊。質以易錢。稼秋大怒。歸而鞭之。妻諫不聽。鞭已。遂出門外。周四恨恨曰。吾必有以報之。稼秋鮮昆弟。惟同母妹一。已字太原王觀察之子。妹亦美慧絕倫。稼秋友愛極篤。某歲赴津小住。途遇鬻婢者。稼秋見之大駭。蓋婢貌酷似其妹。因購之。歸以侍妹。妹亦極愛之。使服飾如己。見者眩惑。不知誰爲女公子也。先是妹病癡。數年弗瘳。而觀察家遣媒請娶。稼秋告以病。乞緩期。視察忽使人來絕婚。詰其由。則謂女不貞。稼秋怒。欲訟之。官妻泣止之。不可。觀察亦控稼秋有穢行。官受觀察賄。竟拘稼秋至庭。觀察之證人。卽爲逐僕周四。縷述稼秋中葺之醜。稼秋忿與之辯。謂僕挾嫌誣陷。周四笑曰。女公子腹已膨脹。安能諱。官遂牒拘其妹。妹與嫂對泣欲死。婢忽進曰。奴婢身受厚恩。無以爲報。今日願代往。獄可勝而冤可白也。遂扮稼秋之妹。登堂受驗。周四見之大驚。不知其爲婢而非妹也。驗者不敢妄報。官以

受賄故。第謂女有廢疾。判離婚姻。責僕誣證而杖之。蓋周四被逐之後。卽投觀察家爲役。因善迎合。大被寵用。周四稔知女病。遂譖言稼秋有穢行。如遣媒請娶。必被拒。已而僕言果驗。觀察遂信而絕婚。但稼秋在津買婢。與妹貌絕相似。僕實不知。故得以身代之。而僕竟失敗耳。後妹病瘳。嫁浙中某姓子。伉儷綦篤。婢仍侍之終身焉。

審翠玦奇案

贛人魏文卿。精明能幹。經商漢臯。年穫贏餘。積資數萬金。尋值武昌義旗首舉。漢口適當衝要之地。文卿懼戰事發生。營業必遭損失。乃盡其所有。滿載而歸。並挈一妾一僕。扁舟一葉。蕩漾煙波中。令人稱快。加以妾姿妖冶。僕性狡黠。文卿嬖之甚深。舟行揚子江中。四顧蒼茫。水天一色。僕忽萌惡意。暗忖妾素有情於我。曷不殺文而攘其妾。且船中金銀巨萬。一生可以吃著不盡。遂私與舟子商。許以重資。舟子利其多金。任僕所爲。及抵中流。羣盜呼嘯而

集。喝令停舟。僕乘勢懷刀入艙。以刃擬文卿之頸。命以妾爲贈。文卿泣然允諾。乞留殘喘。僕嚶笑一聲。手起刀落。登時絕命。文卿手御一翡翠玦。產自雲南。洵連城璧也。僕涎之已久。當卽取下。自御於指。其時羣盜已至。登舟大索。入艙。大聲叱僕。僕膽頗豪。見盜不懼。微笑曰。一家人何必如是。舟中財物。隨意取去。惟女子請留以贈我。盜許之。頃刻間。擄掠一空。並殺舟子數人而去。魏妾顫聲哭曰。爾何不爲後日計。今財帛盡被盜劫。爾我衣食。將求之於何所耶。僕聞言。躊躇久之。始徐徐曰。事已如此。不如歸魏家中。以盜劫告之可也。妾頷之。遂同至贛。魏妻見僕妾二人。狼狽而歸。大疑之。僕備述遭劫情事。並主人被盜殺害之狀。魏妻痛哭失聲。僕亦哭甚哀。舉手揮淚。魏妻忽見僕指御翡翠玦。恍然大恍曰。僕所謂盜者。卽僕是也。乃鳴諸官。控僕妾通姦。殺主圖財。官乃逮二人審問之。僕見事已敗露。乃謂妾曰。圖財之寃。莫能剖白。然我因愛汝故。鑄此大錯。今鐵案已成。我死必矣。然汝豈能獨生耶。妾叱曰。

汝自殺人。與我何涉。僕又嚙笑曰。生雖不能與汝同衾。死當與汝同穴。以償我宿願耳。及審訊。日自認與妾通姦。殺害主人是實。妾泣曰。我與汝何仇。而必欲誣我。致我於死地耶。僕曰。我無他故。實愛汝耳。獄具。二人皆棄市。

審鑽戒奇案

金閩沈某。有女名蓮影。肄業上海某女學校。風流跌宕。放誕不羈。課餘之暇。常約同學諸姊妹。游覽街頭。一日邂逅一少年。丰姿俊秀。固濁世之佳公子也。一見之下。兩相愛悅。遂假他事通欸曲。自此每逢星期。輒相會於某處。一叙數日離情。有見之者。莫不曰。郎才女貌。誠一對妙人兒也。少年爲某公學之高材生。姓姚。雙名玉峰。常州人。幼失怙恃。勤而好學。與蓮影訂有終身約。蓮愛情蓬勃。速姚挽冰人。求婚於父母。以冀早賦桃夭。姚漫應之。蓮嬌嗔曰。汝之愛我。殆非出於真心耶。姚聞言駭甚。不知所答。蓮又曰。吾儕作此秘密行爲。決非長久之計。儂實於心不甘。君如不急求冰人。出而正式訂婚。儂與

君將從此別矣。姚乃央之曰：事已至此，不得不以實言相告。吾蓋無家室之人也。肄業學校，亦賴戚友資助。今蒙卿青眼相加，雖有求婚之意，豈能再於戚友前作無厭之求乎？幸卿恕我。蓮曰：無恐，可求一識家父者，作撮合山事，無不諧。姚大喜，歸訪同學陳某，與蓮父有一面緣。央其以蹇修自任。未幾，婚事果成。入贅沈家。合卺之日，懸燈結彩，鼓樂齊鳴。甫成禮，蓮父忽見婿面，疑竇頓生。又見婿手御鑽石約指，光彩奪目，乃以手指之，大呼曰：趣捉此賊，拘送警廳，以便追究真贓。姚聞言，大駭欲奔，蓮亦惶急，不知所措。至是禮堂中秩序乃大亂。咸疑沈某驟發神經病。蓮泣然欲泣，莫明父意。沈呼警察至，將新婿帶往警所。蓋沈某曾設珠寶肆於上海書錦里口，託人經里店務。每至歲暮，往查賬目一次。某日有一少年，冒名沈某之子，出沈之函，取鑽石戒一事，店夥不敢拂少主意，竟付之。恐有意外，乃發電問沈某有無此事。維時回電未至，少年言奉父命，在家等候，亟須趁此末班火車返蘇。否則今日將不

及矣言已揚長而去。及沈電至店夥始知受愚。今沈見婿所御之約指卽爲自己店中之物。且察其面貌。又與店夥所言者相同。遂信爲竊物之賊。拘交警署。審訊得供。姚曰。家有一兄。久出不歸。舊歲嘗遇於滬濱。出此鑽戒贈我。初不料其竊取而來也。警長又問曰。汝兄現居何處。答曰。不知。乃拘姚於獄。案懸莫結。沈以姚爲竊物之嫌疑犯。取消婚約。並申斥其女。是亦風流案之趣聞也。

審香囊奇案

袁州陸靈秀。年十六。美丰姿。態度翩翩。出而就傅。一日。自塾歸。過一人家。見繡羅香囊。桂於兩壁。蘭麝襲人。製作絕佳。心愛之。就門內呼問曰。香囊出售否。有美婦出見之。笑曰。妾家業此。云胡不售。靈秀問值幾何。婦見靈秀面如冠玉。唇若塗朱。不禁神志搖蕩。乃詭言曰。妾夫携此。日賣於鄉里間。實未識其值。君欲之。第持以去。無須問價也。言時。媚眼流波。頻注以目。且解一以贈。

靈秀。靈秀不解其意。竟受之歸。婦蓋悅靈秀少年。貌美欲假此通意也。後爲同學某見之。詰其所自來。靈秀直言不諱。咸以爲誑。難之曰。倘能更取數具。分贈諸人。則信。不然。將奪爾所佩。靈秀初不肯。允。被同學脅迫。不得已而諾之。他日歸。因重造婦室。婦見靈秀至。以爲奪裳來就也。大喜過望。急引入內寢。具香茗飲之。復設酒饌。款待靈秀。愕然。乃致謝曰。主人款客。何如是之厚耶。欲辭去。婦堅留之。且挑以微詞。靈秀仍不解。婦復整鬟易服。爲妖艷之妝。束嫵媚更甚。以手抓靈秀之面曰。郎君郁李粉桃。幾爲我彈破。靈秀見纏擾過甚。面微赤。恍如朝霞之暈。婦乃取鏡共照。以頰相偎。至是情不自禁。竟撲生就榻。笑而求歡。靈秀大駭曰。此何事。烏乎可。固求欲去。詎婦摟之愈力。靈秀苦不得脫。悲甚。時牀頭有劍。映然作聲。自躍出匣三四寸。靈秀爭脫。掣劍在手。恫嚇婦曰。汝殆不畏劍鋒耶。婦笑曰。爾忍殺我。卽便殺。終不放爾去。遂引頸就靈秀。靈秀見婦無恥已極。心大憤。一劍揮下。淫婦頓身首分離矣。狂

奔而出。及暮。其夫歸。見而大駭。有鄰人某甲者。婦之假父也。常出入其家。夫疑之。執而訟之官。迫於嚴刑。遂自誣服。獄具矣。靈秀聞之。急詣縣自陳。具述顛末。願償婦命。夫聞之曰。有婦若此。宜死久矣。感君盛德。爲我殺之。否則辱我。滋甚。今何敢復相累乎。願息訟以歸。縣官義之。俯允其請。而加禮於靈秀焉。

審繡鞋奇案

某縣有趙錢二人。姻婭也。素喜互相嘲謔。見卽喋喋不休。其地有溪澗。深僅數丈。而湍急。不可以涉。一日。趙錢各約數人。將往某處游。路經溪邊。隔岸相值。一水盈盈。聊通笑語。衆中亦多相識。且言且行。二人復嘲相謔。同游者靡不粲然。錢忽拔所佩刀。戲謂趙曰。忤奴勿再胡言。言將殺汝矣。趙大笑。旣而罵曰。畜生。爾思殺父耶。然我生汝不肖。殺我固宜。語次。以膺相向。嘻嘻不已。錢亦狂笑。挺白刃作擊刺之狀。衆方爲之捧腹。詎趙忽頽然倒地。亟視之。喋

血朱殷。氣已絕矣。衆大驚失措。視錢猶含笑操刀。鋒鏑皆赤色。兩岸喧噪。觀者如堵牆。錢始覺自殺人。欲遁不能。衆環奪其刀。逮以見官。邑令某公。素號神明。聞卽馳往檢驗。驗訖。卽命人過溪上流。俟其涸而窮其異。果有腳跡。發現自此岸至達彼岸。細察之。纖細如錐。不類男子者。觀者皆愕然。令更命人深掘其泥。甫數尺。又得一篋。當衆開視。內藏女鞋一雙。鮮若朱蓮。嶄然未朽。令曰。此夙孽也。且呼錢而謂之曰。汝雖未殺伯仁。伯仁由汝而死。嬉笑興戎。罪實自取。錢亦俯首無詞。遂論抵。

審馬褂奇案

無錫嘗有盜案。賊據確鑿。中有馬褂一襲。盜已承矣。而屢承屢翻。時應敏齋方伯寶時任臬司。心知其寃。親自鞫訊。則見事主之軀幹修偉。而盜爲侏儒也。窮詰之事。主謂賊證現在。何疑之有。應乃取馬褂覆視再三。指以語事主曰。此汝服耶。曰然。令服之。乃甚短小。復以衣盜。則適稱其體。盜曰。今見青天。

矣。此固我之衣也。蓋事主之妻。初有外遇。失物之夕。所私者卽宿其家中。脫下馬褂。懸諸衣架之上。及盜來搶劫時。併其馬褂而挾之去。事主恨妻之有外遇。故卽以其人爲盜。而控諸官。將欲藉此以洩私忿。不意失物之中。有其人之馬褂在焉。迨至緝獲贓物。令事主往認。事主見此馬褂。心中大爲猶豫。倘使不認爲己物。則官必追問爲何人之物。至是妻之醜行。難免宣揚於外。而誣人爲盜之實據。必由此而發現也。不如直認爲己物。或可朦混於一時。初不料應之再三推勘。卒能明盜之非盜。而所私者之寃。乃以白。

· 審衣履奇案

杜有美。太原人。聘盧慧娟女士爲妻。成婚之日。其同窗友周吉人竊謂韋夢蘭曰。有美與慧娟。天生嘉耦。當此定情之夕。不知若何歡洽。我二人當設法偵探。以快所聞。韋曰。唯唯。是不難。青廬上是杜家藏書樓。我與爾大好偵聽。正私議間。適有美在屏後聞之。點首匿笑。默籌預防之法。時有阿笨者。爲有

美乳媪之子。游蕩無賴。酷嗜賭博。博而負。輒盜杜家物。有美惡之。戒閹者勿許其入。阿笨則乘此良辰。早已萌覬覦之念。是日。新娘下輿之時。阿笨在人叢中。溜上書樓。俟隙行竊。漏二下。賓客甫散。有美將次就寢。驚憶日間事。欲覘周章。二人所爲。以博一笑。乃躡足登樓。阿笨正憑欄閒眺。有美窺之。以爲必吉人無疑。悄從背後出。兩手掩其目。阿笨意有美特來調己。既驚且恨。急反身緊挽有美之頸。而扼其喉。須臾氣絕。慧娟方坐幃中。命伴媪出具湯沐更衣。見有美上樓。不知何意。俄聞樓上窸窣作響。心甚訝之。阿笨見有美已死。陡起惡念。欲犯慧娟。爰脫衣履。塞藏書箱下。易以有美之衣履。大步下樓。滅燭入幃。遽抱慧娟求歡。慧娟不肯。竭力撐拒。阿笨知難強合。急探手脫去慧娟兩腕之纏臂金。慧娟益駭極。適伴媪秉燭携熱湯進房。阿笨恐人窺破。掩面而遁。伴媪不知誰何。大驚。急燃雙燭。牽幃見慧娟披髮喘汗。驚魂不定。叩問所以。慧娟備述頃間情狀。方共詫愕。忽聞樓上歛歔有聲。命伴媪燭之。

則見有美赤身臥樓上。吁息不已。蓋喉間一時氣絕。俄而氣復流行。故有此聲息也。惟因暴甦。身體綿軟。猝難起立。伴媪另取衣履着之。緩緩扶掖下樓。偃臥繡榻。默不一語。慧娟情不能忍。急傍身低問所苦。有美自指其喉。搖手令其勿語。慧娟莫喻其故。祇得對鏡縮髮以待。延至五鼓。有美甫能起坐。出聲彼此各述所見。互相慨歎。有美以爲平素待吉人不薄。何竟如是惡作劇。雖劫去飾物。猶幸慧娟不爲所污。又復轉怒爲喜。然變出意外。氣血究難驟舒。竟體疼痛。未免良宵虛度。實則是夜客散。吉人以中酒酣臥齋中。夢蘭以吉人既醉。遂獨自歸家。及吉人醒。見夢蘭已歸。遂亦踉蹌返。將出大門。司閤人見吉人暮夜短衣着靴。倉皇徑去。形跡可疑。詰旦。舉室喧傳夜來事。證以司閤所見。僉謂必吉人無疑。慧娟父大怒。乃具狀訴諸邑宰。宰與吉人素相契。見狀大駭。招吉人至署。以狀示之。吉人閱之。駭汗滿面。謂曾有此說。後各歸家。實無此事。我雖不肖。亦斷不肯逢場作戲。戕人生命。以圖苟合者。尙祈

明察。宰亦信吉人。決無此事。慰令暫歸。越日。集兩造會審。宰一一研訊。拈髯尋思久之。忽悟曰。無論是否吉人之所爲。現在杜家飾物。固明明有人。劫去且據有美赤身臥樓上。所有衣履。盡被其人着去。則其人自着之衣履。必脫藏樓上。搜得衣服。便可明晰。乃率吏役。親往樓上窮搜。果於書箱下。索得破衣袴襪數事。並腰橐內有信一封。閱之。乃無賴與阿笨招賭書也。宰笑曰。得之矣。付兩造觀之。始各恍然。亟命拘阿笨來。一訊而盡吐其實。吉人之寃以白。

審棉絮奇案

衡水某村。有謀殺親夫案。乃婦與豪右私通。而謀殺其本夫也。原告爲死者之姪。奸夫以多金賂伴人。央其袒己。及驗屍。爲因傷斃命。官不能理。轉斥原告誣妄。痛懲之。復訴諸府。太守委定興令往按之。令至。反覆相驗。不得證據。夜宿館舍。思維不置。披衣起坐。時約三更。將盡。從人皆熟寢。榻上鼾聲相和。

已而寒風起自戶下。簾幕微動。燭光昏暗。見壁角隱隱現一人。乍前乍却。倏然跪於地下。令不禁毛髮森豎。竊神諦視。其形狀服色。彷彿日間所相之屍也。微作啼泣聲。右耳畔垂一白物。令忽大悟。曰爾有冤。吾必爲爾雪之。爾其歛跡。吾知之矣。其人叩頭而隱。燭亦驟明。令遂就寢。翌日折柬約衡水令至。曰氓之蚩蚩。詭辭興訟。苟不立鐵案以杜其口。將何以肅公令而靖刁風乎。請與公督責作人。同至屍所。使死者無遺憾。生者無遁辭。庶幾上可以覆府尊。下可以服衆庶。衡水令見書笑曰。人謂定興令書癡。良不誣也。作官十年。貧如寒士。其才可想而知。似此公案。豈拙宦所能辦耶。於是復往相之。定興令叱使檢視右耳。作作失色。乃於耳中取出水濕棉絮。須臾堆積。約略半斤。指示衡水令曰。此奸夫淫婦之所以得志也。衡水令大驚駭。再揖謝曰。似此奸謀。不特目所未覩。抑亦耳所未聞。微公孰能知之。定興令曰。此冤魂之靈。非弟之能。卽於屍前提奸夫淫婦。嚴刑拷掠。盡得其狀。奸夫坐斬。淫婦坐凌。

遲。

審剪刀奇案

興化縣之東鄉丁家莊。有顏某者。農人子也。年方弱冠。自命風流。鄰有少女。頗具姿色。顏豔之。相與目成。漸通情好。憐卿憐我。互以白首爲期。惟兩姓高堂。莫喻其故。二人又赧於自達。祇有背人私誓。寧死勿變。初衷而已。詎意好事多磨。顏爲母命所迫。締婚他姓。雖知鄰女不可負。而親命難違。不得不曲徇之。受室以來。伉儷甚得。鄰女得悉其事。知顏背棄前情。憤不欲生。輾轉思維。忽得一計。乃使人傳語於顏。謂苟得最後一面。罄訴衷腸。雖死亦無憾矣。顏亦自知背誓之罪。乘閒趣詣女室。向女緩頰再三。女意似無他。且纏綿如故。顏乃大惑。乞作片刻歡。女並不拒。方登陽臺。女忽乘顏不備。從枕旁潛出。并州利剪。向顏袴下猛剪。顏方覺痛。而勢已落。乃知爲女所賺。負痛奔歸。頹然而倒。妻見狀。大驚失色。急詢其故。顏悲泣曰。鄰女殺我。汝必爲我復仇。妻

聞言。呆立不解。顏卽褪下衣示之。血滿衣袴。妻大駭而呼。顏母聞之。疑夫妻反目。亟往視之。顏已血竭面灰。憊不能語。婦亦格格不能出一語。僅以指指顏下體。以示其姑。姑錯會其子爲婦所害。忿怒已極。亦不激底根由。遽返身入廚下。操廚刀向婦亂砍。婦不及避。竟遭砍斃。兩尸橫陳一室。血濡滿地。慘不忍觀。顏母不知所措。出告鄰舍。謂婦殺吾子。而吾已手刃婦矣。鄰舍駭而奔集。僉曰。新婦性情溫柔。何致凶暴若是。方詫異間。忽見鄰女挺身而至。大聲向顏母曰。殺汝子者我也。奈何冤及新婦。我本早決一死而爲此。今來自首。請卽捉將官裏去。羣衆陡聞女言。莫不駭怪。後因女固請送官。乃勸顏母繫女而訴之。顏母卽命人逮鄰女。投請法庭訊鞫。女直認殺顏不諱。顏母以誤會而殺其婦。當庭亦慷慨自承。審訊之日。觀者如堵。莫不詫爲奇案云。

審剃刀奇案

京師朱茅胡同三等茶室。鱗次櫛比。中有三順茶室。有妓名紅寶者。年二十

九小徐娘也。姿首絕佳。風騷動人。賣笑生涯。冠於儕輩。睨一理髮匠崔某。鵝鰓。我我卿卿。訂有白頭約。故崔所得之工資。強半供於紅寶。一夕。崔被友輩所勦。拉入酒肆。強之飲。不覺酩酊。詣院訪其所歡。時紅寶室方有客。崔格於例。祇得在外室坐候。歷一時許。微聞室中膩語。若甚狎暱者。崔敢怒而不敢言。旋紅寶出。伺應如平時。客亦掉首而去。崔入室。遂薦枕焉。睡至半夜。紅寶覺頸間被人刎割甚痛。驚而起。燃火燭之。見崔之頸血。已濺滿衾枕。紅寶駭極。狂呼。龜鴛等聞聲入視。崔已氣絕。血流如注。急報警區。由檢廳檢驗。係用剃刀自刎身死。紅寶被崔刎傷甚重。檢察官立傳理髮店主面訊。供稱崔某平日好作狹邪游。已於日前辭退矣。崔家在城外。並無父母。質之紅寶。則稱崔係熟客。並無仇隙。是晚來時。似乎中酒。因見室內有客。略含醋意。不知何故。竟欲與妓同死。檢察官得供後。崔係自刎身死。與人無干。飭善堂掩埋。紅寶與理髮店主當場開釋。案遂結。

審鐵斧奇案

朱某在海昌城外業絲。其夥孫某。貌和而口給。能羅致客商。朱業藉以日隆。未幾。孫忽辭去。在城內自立絲肆。客商舍朱而就孫。於是朱業漸敗。朱恨甚。誓必報之。一日。朱與朋輩聚飲酒家。談次。論及孫某奪業事。怒詈不已。座中一少年微哂曰。庸奴焉敢殺人。朱聞言。突然而起。竊酒家鐵斧。狂奔出門。羣友追阻之。咸歸咎少年。少年連連謝過。事遂息。朱回家坐而不寐。四鼓許。潛往孫家。微叩其門。孫素有心計。夜必自起應門。甫拔關。朱突砍其頭。棄斧而遁。家人出視。孫已腦裂而死。稟官往驗。見斧柄有字。遂至酒家詰之。酒家曰。無論有仇與否。豈有殺人而不遁者乎。是斧被竊。遺害小人也。官曰。昨飲者有口角否。酒家曰。有某少年。曾以言激朱某。喚少年至。陳其始末。拘朱至案。一訊而服。已置獄矣。其妻遍求名訟師而謀之。僉曰。殺人者抵。古今一律。雖諸葛復生。亦難平反。時有嚴某在傍。拍手狂笑曰。如不恤費。事尙可爲。妻曰。

情願傾產以聽命。嚴曰：先教汝夫。忽認忽翻，以緩其獄。我入省垣謀之。半載可釋。妻叩首以謝。越日，嚴携金赴省，覓臬司衙中之吏，詢以近日盜案。吏曰：甫送大盜至，尙未過堂。嚴大悅，卽賄吏，願一觀大盜。吏許之，引嚴往見。嚴笑曰：汝何爲盜盜？小人家無恒產，而爲父母妻子累，謀業皆不能遂，是以出此耳。嚴曰：今家已富耶？盜曰：贓被官起，何富爲？嚴曰：汝父母妻子今有養耶？盜泣曰：小人死在旦夕，何能再顧？嚴曰：有能爲汝養家者，汝再承一殺人事，願乎？盜曰：雖十死亦願。嚴曰：願以千金爲汝家人生活計。汝過堂時，必詰問他案。汝卽承某年某月某日夜，在海昌城內某酒肆飲，竊得巨斧，往孫某絲肆圖劫。有老者持燈出，被執衣裾，情急思遁，遂殺之。如是而已。盜允諾，亟召其家人至，與以千金，盜感甚。未幾過堂，卽承是案。行文詰問官，官乃吐舌曰：有是哉！斷獄之難也。嚴刑之下，何求不得。吾幾誤殺好人，急出朱某於獄而釋焉。

審白刃奇案

汴省某縣。其俗喜爲小子娶長婦。藉以操井臼。持門戶也。有農家子。年甫十四。而所娶之婦。年齡倍之。新婚次夕。賀者畢集。日已午。寢門猶未闢。舅姑呼於門外。聞子應聲而不見其出。穴窗視之。則見子縛於牀足。驚問其故。答曰。昨夜已闌。有男子自牀下出。突將我縛住。擁新婦同睡。問何故不言。曰。言則殺我。語未竟。男女二人啟帳出。男抗聲曰。我與新婦夙有交。今我至此。容當盡歡而去。如敢破扉入者。我必刃爾子之腹。言次。袖出白刃。熠熠光寒。令人生怖。舉家驚惶失措。計無所出。男子又踞坐索食。不與。則將殺其子。於是觀者雲集。相持數日。聞之於官。官亦駭異。問新婦有父母乎。曰。有。乃逮之。使呼女。不應。官命隸笞其父。臂批其母頰。父母呼女。哀號甚慘。女若不聞也者。母頰批至百。父臀笞至二百。流血漉漉。父母跪窗外。哀女開門。仍若罔聞。官乃命人邏守。繫其父母去。時獄中有一賊。善穴壁。官命賊伺男女睡熟。從屋

後穴而進。潛以刀斷子之繩。門外邏守者。乘勢破扉突入。將男女縛住。送之縣中。事轟全邑。觀者自大門至大堂皆滿。官鞫之。男子乃屠者。面麻而多鬚。黑醜可憎。女則娟娟白皙。風致絕佳。官戟指女而厲聲罵之曰。吾閱人多矣。從未見無恥如爾。不孝如爾。爾貞犬彘之不若。非人類也。律載婦女犯姦。去衣受杖。乃命左右盡去其上下衣。不留寸絲。先批頰如母數。再笞臀如父數。然後科以通姦罪。決杖四十。命其父母領去。父母扶裸女出縣門。各脫衣衣女。而觀者爭前褫奪之。竟不得衣而歸。屠者笞死。女杖創尋愈。後有人於逆旅中。見女爲人行酒。風致如故。而頰間之批痕尙留焉。

審悶香奇案

有楚某者。弱冠娶顧女爲妻。艷麗無雙。性亦貞潔。與人寡言笑。所謂艷如桃李。冷若冰霜也。鄰有孀婦。冷而蕩。不守閨範。與執袴子劉四狎。劉過孀婦家。偶見顧女貌。垂涎三尺。以重資賂孀婦。謀私之。孀婦曰。彼燕爾新婚。唱隨和。

睡。且爲良家婦。既不可以勢逼。又不能以利誘。雖其夫出外教讀。家中祇有老嫗作伴。然老嫗人極忠直。難以游詞動之。實無法可施也。劉四聽婦言。不能遏止其情慾。乃以重價覓得積賊之悶香。謂婦曰。我已得計。第不能穿穴踰牆。若能誘至汝家。事必諧矣。言時。並出悶香示之。婦曰。是不難。使劉市食物之精者數色。携之往候女。并以甘言結好。互相往還。如是者非一日矣。一夕。婦留女小膳。精饌數盂。味皆適口。食至半。婦以小遺告便。女乃獨酌。忽覺芬芳馥郁。觸鼻欲醉。蓋劉已預伏室隅。密焚悶香。女頓軟癱於座中。劉突出擁之登牀。女手足麻木。口不能言。而心甚了了。任其狎褻而已。事畢。女羞恨滿面。淚珠錯落。劉知難以久留。卽遁去。女醒。覓婦不見。搗其室中什物而歸。鬱鬱成疾。臥床不起。其父固名訟師也。聞女病。往探之。女欲報讎。覲覲直陳其事。父責其不應輕出。致遭強暴污辱。然事已如此。彼以陰謀來。我當以詭計報之。隨作一函。納女枕畔。謂女曰。可使嫗來。我命兩兄助汝。言畢。

憤憤而去。女知父留函，必係錦囊妙計，拆而閱之，喜溢眉宇，病竟霍然而愈。攬鏡修飾，倍增媚媚，暗囑老嫗強孀婦來謝過。來則更形親熱，留宿家中，密告之曰：前日之事，曷不先與我謀，我良人久客不歸，晨昏孤寂，誰能遣此？若人實獲我心，但面許我之衣飾，何食言也。孀婦意其心動，乘間言曰：劉某富而多情，酷愛娘子絕色，祇以無路可通，非敢負所許也。今我爲娘子導引，何如？女曰：須知屬垣有耳，若人來，必於夜深人靜後方可。我遣老嫗於門內遲之，當無他慮。孀婦然之，訂期而去。歸告劉四，自詡其功。劉大悅，雀躍者三。急購鮮衣美珠，使孀婦先致之。如期留孀婦家，及夜漏四下，潛以指叩門。老嫗携之入，劉見女，卽欲亂之。女曰：旣來之，何急急爲？請同酌數盃，以助興。時案上酒食具備，精美絕倫。女殷勤勸酒，劉目視而不飲。女乃舉杯坐懷中，口含以哺劉。劉神志迷亂，接而咽之。忽見兩人操刀直入，劉見勢不妙，狂奔而出。遇地下之繩，絆足而跌。女以燭來，兩人縛劉之手，盡割其辮髮。女釋縛，縱之。

使去。兩人携辮。操刀輕叩孀婦門。孀誤劉歸。俏語曰。溫柔鄉正好滋味。何又匆匆回。想必敗陣而逃也。門甫闢。兩人卽猛刺其腹。飲刃而倒。以髮辮縛婦右手數匝。歸告女曰。大事已畢。可以覆父命矣。兩人實卽女兒。預伏房外。安置繩以絆劉之足。女所哺劉之酒。實啞藥也。劉逃歸。啞不能言。次日地保見孀婦被殺。鳴官相驗。見兇刀插心。手握髮辮。必係強姦不從。爲人殺死者。密訪失辮之人。獲劉四。無言置辯。遂按律斬之。

審藥酒奇案

張某。金閩人。偕妻嚴氏。往京中開張雜貨舖。生涯茂盛。別營三椽於羊肉胡同。寓內惟一妻一子。雇一年輕嫠婦作伴而已。鋪內一夥。年逾五旬。嚴氏自作餐饌。張某爲之傳食。夥憫主人之勞也。謂何不覓一僕任其事乎。張某首肯。其夥晨起。灑掃門前。似已有人先爲掃除者。潔淨倍常。留心察之。則落魄少年所爲。夥心喜其人。遂叩其意。少年曰。吾乃南人。落魄於此。日爲人效

奔走以糊口。夜宿翁店前簷下。翁雖不知於心。殊覺不安。故略效微勞耳。夥
悅其勤慎。薦與張某試用爲僕。其人不惜辛勤。不辭勞瘁。凡所作爲。頗能先
得人意。內外皆愛憐之。如是者半載有餘。僕已暗與嫠婦通。一日張某購貨
赴通州。囑僕看守門戶。內則嚴氏挈幼子。與嫠婦同室。夜漏三下。幼子已睡
熟。二婦在燈下刺繡作女工。忽有叩房門者。嫠婦拔關。僕操刀入室。突擁嚴
氏曰。汝必與我爲歡。否則不汝貸也。嚴氏急呼嫠婦救之。嫠婦笑曰。一家人
庸何傷。主人不在。姑嘗試之。嚴氏知其同謀。料難與敵。一時情極智生。卽回
噴作喜。謂僕曰。汝果有情耶。室有吾子在。恐被窺見。不能永爲歡好。汝先入
西廂。遲我可也。僕與嫠婦笑曰。眞精細人也。嫠婦先抱衾枕而去。僕料其孤
掌難鳴。亦携刀狂笑隨去。嚴氏暗忖。若輩奸刁可惡。必有以懲之。乃繫束其
衣入西廂。僕遽起擁抱。笑曰。卿果來耶。可解我渴。嚴氏笑却之曰。我素愛汝
精細。今何粗莽乃爾。但吾對於此事。素不願草草爲之。以故夫君在家時。合

有藥酒一種。臨時飲之。可以堅戰。男女交暢。不亦可乎。婺婦曰。我亦知之。苦未能嘗試耳。嚴氏順勢謂婺婦曰。今我三人同心。不妨嘗試之。遂指藏酒所。同婺婦取一樽。至。並携果食共飲。香美異常。嚴氏力勸二人盡量。且盡力獻媚。任僕撫摩。若甚甘心者然。僕竟大醉。自脫上下衣。仰臥炕上。醉語曰。速來嘗試。乘此酒興。切勿再延。嚴氏遣婺婦去睡。且曰。待我事畢。易汝何如。婺婦含笑闔門而去。嚴索其刀。猶在身畔。乃舉刀力砍。破其腹。僕忍痛躍起。嚴復劈其腦。始仰跌地上。而斃。婺婦聞聲。披衣叩門。笑曰。汝等如是猛戰。鄰舍聞之。不畏洩漏機關耶。呼僕啟門。我欲作壁上觀也。嚴隱刃身後。潛拔其關。婺婦見僕已僵臥。賊聲欲喊。嚴從腦後劈之。仆地亦斃。嚴額手私慶。携燈出。反鎖其門。睡至次早。倩鄰婦呼其夥來。告之曰。昨夜僕與婺婦同逃。幸未竊物去。汝速遣人呼主人歸。商其事。當報官否。夥急雇人喚張某回。張歸家詢事之顛末。嚴含糊以對。及夜深人靜時。始以殺人事告之。張某愕然。嚴曰。郎必

出首。有罪妾當自任。若潛隱其事。日久必破。郎亦不能辭其咎也。張某然其說。遂鳴之官。官親自蒞驗。訊嚴氏侃侃直陳。一字不諱。官見嚴氏理直氣壯。乃不問。命役瘞埋二屍。一場風流姦殺案。就此告結。

審砒霜奇案

某翁年近古稀。有子三人。均名列膠庠。翁每出跨一黑驢。從一小奚奴。徜徉自如。人皆豔羨之。一日偶至城中某藥肆。託言植花爲蟲嚙。俛所識者爲證。售得砒霜兩許以歸。人以其年老語摯。不之疑。乃某翁忽發奇想。購飴糖幾許。雜以砒霜數錢。共椎爲細屑。和麵作餅餌。煩鄰婦代蒸之。餅既熟。翁自攜去。莫知所用。詎翁置餅道左。嬉笑而返。適近村有新婦歸寧。復回夫家。從小弱弟控蹇而行。瞥見食物一包。委諸路側。取而啟視之。熱氣薰蒸。如新出於籠者。婦方以母家甚貧。歸無所攜爲恥。得此乃大喜。因命弟珍重捧齎。及至夫家。卽矯母命。獻於舅姑。舉室皆有喜色。餅僅七枚。婦之夫適他出。室中

之人恰符其數。乃分而啖之。其姑不願自食。以飼婦弟。婦以所攜無多。力呵弟使去。不令分姑之食。姑始食。未幾毒發。闔室譁亂。又未知所由。無從救治。七人竟無一生者。夫歸。執婦送之官。慘被刑楚。嬌弱不勝。遂誣服。律當寸磔。其弟因亦知情。論斬決。刑有日矣。忽某翁詣官自首。兼以乾餅爲證。提婦驗之。款式悉合。翁曰。吾忽作此想。聊以爲戲。初不謂其可以殺人也。今聞婦之冤。不覺惻然。故敢到案自陳。惟我之爲此。自己亦莫解何心。官聞其語。歎息不止。謂是殆前生冤孽。遂定翁以毒斃七命。法應大辟。有加。子孫雖不與謀。成丁以外皆論死。一家幾無噍類。新婦之冤乃白。夫以七十老翁。忽然作此想。又突然行此事。非冥冥中鬼神使之耶。婦以無辜。遭此冤獄。若非翁之自首。不幾蒙不白之冤乎。然則折獄者。可不慎哉。

審西瓜奇案

崑山有富翁楊氏。單生一子。名曇華。聰穎過人。年十五。出就外傅。離家有數

里之遙。一日自塾歸。過葛氏之門。忽有自內傾盆水者。濕曇華衣履。視之。婉然好女子也。曇華不爲忤。笑而去。他日過之。女子復傾水如前。曇華疑其有意。遂惑焉。抵暮。逕入女室。而女及父母皆坐於堂中。殊未之見。是夜。女闔戶。牽帷欲睡。忽見男子橫臥其榻。大驚欲呼。曇華遽起掩其口。脅之曰。吾兩過卿門。卿兩以水澆吾衣。是誨我來也。吾有辭矣。復何畏。女大冤苦。而莫能置辯。曇華擁女共臥。指天誓曰。女亦心動。弛衣就之。時新秋天氣。殘暑未退。恣情歡狎。狂蕩中宵。曇華渴甚。向女求飲。女以夜深。顧無由得。憶床下有西瓜一枚。剖以食之。既盡。昏然就睡。天將曙。女推之使去。則已死矣。徬徨無策。掩袂嗚咽。至午而門不啟。父母怪之。破門而入。得其狀。且怒且懼。曰。楊某繼三妻。納數妾。惟此兒愛護若掌珠。今歿於此。奈何。奈何。馳告之。楊哀憤訴於邑宰。言葛女誘殺其子。宰覽其詞。謂烏有少年處子。鍾情所歡。而復殺之者乎。庭鞠之。女具訴顛末。至食瓜事。宰笑曰。是矣。猶戰鬥甫息。盜賊入其室而刺。

之。烏能不死者乎。時女已受聘陸氏。曇華亦締婚姚氏。宰遂判以姚配陸。以葛歸楊。幸女已有娠。遺腹生一子。接續楊氏之後。而終身守節焉。

審翁壻奇案

曩有一巧令。斷案如神。茲特記其一案。有劉某者。孤獨少年也。入贅於李姓。李翁欺其穉弱無能。虐待之。劉不堪其苦。潛投仕宦家爲僕。得主寵愛。數年間積得四百餘金。辭主人歸。與妻謀置產業。妻乃炫於父母之前。李翁頓起不良。設宴爲壻洗塵。醉之以酒。謂之曰。汝妻年少。交以多金。恐不勝任。況汝須出外謀事。得無有穿窬之慮乎。盍交余權爲收藏。俟汝無慮。劉唯唯。取銀交之。次早。劉酒醒而悔。亟向李翁索銀。李曰。汝赤貧如丐。隣里皆知。安得有銀寄余。不思爲汝育妻之恩。反來肆訛耶。其女助壻爭論。李大怒。逐夫婦於門外。劉冤忿難平。訟之官。以妻爲證。官曰。汝物無憑。妻不可以爲證。我不能直汝。揮之出。劉素諗巧令名。往陳其苦。令曰。隔境無能爲力。劉哀之切。令笑

曰。汝必欲余明此冤。須暫禁囹圄。汝願之否。劉曰。願。令卽械收之。乃移文其縣。曰。日者獲一大盜。據控劫得某事主家四百餘金。寄頓貴縣某村窩主李某家。希卽委員帶捕起賊。連窩主解質云云。縣官見係盜劫重情。親自查抄。人贓並獲。星夜解交。令乃塗劉面以墨。囚衣桎梏。繫於堂下。呼李詰之曰。盜供在某家劫銀。寄頓汝家。今所起贓數相符。汝爲盜窩。罪當梟首。速據實陳明。勿自膺三木之苦。李惶急呼冤曰。吾銀實係贅壻劉某所寄存者。聞其在某宦家積蓄而來。是否屬實。請拘對質。令笑曰。若見劉某。汝又將圖賴矣。李曰。與其冤誅。莫若明心。令曰。若然。則劉某在是。乃釋其桎梏。使洗面易服。相見。李大慚。俯首無詞。令乃給還劉銀。而薄責李曰。余爲汝壻留翁壻情也。劉感謝而去。李亦從此悔過矣。

審姊妹奇案

十姊妹。粵中之陋俗也。有邱慧秋者。珠江富家女。惑於十姊妹之說。竟盲從。

之約。畢生不字。遵守獨身主義。年稍長。父母爲訂婚於韓氏子。少年倜儻。有璧人之目。慧秋心本不願。轉念此如意郎君。殊非易得。於是不復憶及前約矣。姊妹聞之。羣來詰責。且脅其父母離婚。慧秋殊弗願意。以親命難違。對衆怒。慧秋破壞條約。遂起口角。舌劍唇鎗。攻訐不已。嗣經家人勸解。衆始悻悻而去。奈心猶不甘。遂萌毒念。一日。慧秋方料理晨粧。一小婢持郵函至。慧秋以唾沫作并州剪。啟而讀之。函曰。

慧秋妹妹粧右。前舉吾輩殊唐突。獨身主義。應出己願。今妹覓得如意郎君。遽毀前約。吾輩烏可相強。故深知自悔。且已重行組織。補入新黨員。然前此交誼。一旦喪失。深爲可惜。幸妹仍以友朋目之。他日于歸。勿吝一杯喜酒。俾省識新郎玉貌也。特此奉聞。維希垂諒。

十姊妹具

慧秋閱畢。信爲若輩真正反悔。乃仍與之往來如舊。却扇之夕。衆咸來道賀。謔浪笑傲。春生一室。及新郎新婦對飲合歡之酒。衆左右環列。調侃新郎不

置。移時。興辭而去。新郎忽狂呼腹痛。倒臥新牀。奄奄一息。百端救治。均歸無效。頓時舉室大亂。家人以新婦曾爲十姊妹。或卽爲其所毒。亦未可知。立縛慧秋入官。慧秋蒙此不白之冤。自怨命乖。故當堂直供。惟求速死而已。後有人於慧秋新房中。拾得紅色小簡。視之。乃衆留以示慧秋者。書中略曰。

妹自適快婿。乃棄吾輩如敝屣。噫。快婿已矣。殊深惋惜。然非此不足以儆妹。苟能猛省。仍當設法援妹出獄。容再布言。以明真相。 十姊妹具

於是衆始知慧秋之冤。遂復訴於官。盡執諸女。而釋慧秋。慧秋既歸。哀毀成禮。哽咽終朝。無復有生人之趣。遂仰藥以殉。嗚呼。慘矣。

審新娘奇案

晉有某巨室。爲子娶婦。成禮之夕。衆賓循俗例。開新房。至深夜始散。時新郎尙未入房。新娘頗覺勞頓。斜倚粧臺而坐。以手擁髻。忽有賊推門而入。聞背後有人行步聲。急竄匿牀下。新娘意爲賀客惡作劇。心甚惡之。未幾。新郎入。

入時不暇溫存。猝牽衣催與同宿。新娘恐爲惡客所窺。努嘴示意。新郎不解。強之再三。新娘以手指牀下。新郎掀床幃視之。則赫然一男子也。怒叱曰。爾爲何人。從何而來。賊乘勢一躍而出。疾行至庭中。呼曰。怪事怪事。人情反覆。一至於此。時衆人聞聲畢集。爭詢之。賊曰。諸君以我爲何如人。我卽新娘之情夫也。新娘未嫁時。與我交情甚密。此番遣嫁。彼此難捨。約於新婚之夕。使我乘間先入。俟新郎睡熟。將其謀斃。不料婦人水性楊花。得新忘舊。入此富貴之鄉。竟視我若不相識也。新郎憤曰。娶婦如此。有辱吾家門楣矣。速將賤人與情夫捆縛之。送縣懲辦。不然。吾必手刃此賤人矣。衆人皆曰。然。遂請男客解賊。先往縣中。女客與新娘繼之。時女之父母聞信而至。謂某巨室曰。小女在家之時。人極貞靜。未嘗有苟且之行。如果所控非誣。吾亦不容此女立於人世矣。否則捏詞誣人。咎將誰屬。縣令聞報。立延兩家父母及親戚。入花廳中觀審。先傳新娘至案前。畧訊一過。卽命送入內室。次訊賊。賊仍自認爲

女之情夫。與新郎訴詞相同。令曰。爾與女私通。有幾年矣。曰。久之。令曰。然則爾識新娘乎。曰。安得不識。令曰。爾既識之。吾將當面試爾。若能於衆人中。指出孰爲新娘。吾乃信爾。賊曰。此有何難。令卽傳語夫人。請率諸姬及媳婦輩。偕新娘同出。使賊認之。賊乃妄指一紅衣少婦。曰。此卽是也。令曰。汝認真否。曰。認真矣。令勃然大怒。叱曰。狗！毋復言。此非他人。乃吾妾也。新娘明明在此。爾竟不識。尙敢誣與之私通已久。若不從實速供。將用刑矣。賊曰。小人知罪。小人聞新郎家係著名鉅富。欲往行竊。不意被新娘窺破。故藉此誣讎。冀可脫身。實無害新娘之意。乞青天鑒之。令曰。汝甘心作賊。法已不恕。而又誣人通姦。罪加一等。卽命重杖之。枷號示衆。案旣白。兩家始釋嫌。敦好如初。

審貪吏奇案

交河有爲盜誣引者。鄉民樸愿。無以自明。以賂求援於縣吏。吏聞盜之誣引。由私調其婦。致爲所毆。故以此報復之意。其婦必美麗。因却賂而微示以意。

謂曰。此事須鄉民之婦。潛身自來。乃可授以方畧。居間者反以告鄉民。鄉民
憚死。失志呼婦。母至獄。私語以故。母告婦。婦怫然不應。越三日。吏家有人夜
扣門。吏方坐燈下。聞剝啄聲。啟視則一丐婦。布帕裹首。鶉衣百結。急趨而入。
吏問之不答。且行且解其衫與帕。則豔粧華服之美婦也。春山微蹙。秋水橫
波。令人見之魂銷。吏驚爲天仙下降。問其所自。則紅潮暈頰。俯首無言。惟袖
出片紙。就燈下視之。僅某人妻三字而已。吏喜出望外。引入內室。故問其來
意。婦掩面泣曰。不喻君意。何得夜來。旣已來此。不必問矣。惟祈無失信耳。吏
指天誓日。遂相嫵婉。潛留數日。大爲迷惑。婦瀕行。又謂吏曰。村中日日受侮。
難於久住。如在城中。君能賃屋數楹。則妾可託庇蔭宇。免受無賴之欺凌。且
可朝夕常相往來。未識君意以爲如何。吏大喜。竟百計白鄉民之寃。獄解後。
吏遇鄉民於途。意甚漠然。以爲狎昵其婦。愧相見也。後又因事到鄉。親詣鄉
民之家。拒而不見。知其相絕。乃大恨。會有挾妓誘博者。訟於官。官斷妓押歸。

原籍。吏視之。鄉民婦也。私就與語。婦詭言曰。苦爲夫禁制。愧相負而相憶。殊深。故出此下策耳。今幸相逢。乞念舊情。免杖免解。吏又惑之。因告官曰。妓所供。乃母家籍。實縣民某妻。官究其夫。蓋欲慫恿官賣。以便從中自買也。遣拘鄉民。鄉民攜妻至。乃別一人。問鄉里。皆云不僞。問吏何以誣鄉民。吏不能對。蓋吏初欲污鄉民妻。鄉民妻念從則失身。不從則夫死。值妓新來。乃盡脫簪珥賂妓。使妓冒名而往。吏不知其詐。而誤以爲真。乃鄉民之妻。今當受杖。適與相遇。因仍誑託。冀免箠楚。不虞吏又有他謀。以致兩敗也。官覆勘鄉民。果被誣。又念妓之冒名。初爲救人之死。且又計出於鄉民之妻。乃釋而不問焉。

審貨郎奇案

耒陽某村有農家。植竹甚夥。方圓數畝。密葉陰森。其家父子三人。兄馴弟劣。且好游蕩。父深惡之。有某貨郎。時來村中。售花繡絨線之物。來輒信宿不行。其家有女。年已長成。猶待字閨中。最受購貨郎之物。貨郎以習熟故。漸與通。

焉。一門皆罔覺其事。一日。女父返自田間。瞥見貨郎與女。交頸接吻。狀甚猥褻。大怒。即以力田之器。突前猛擊。貨郎猝不及防。破腦而斃。父素愛其女。懼醜聲之外揚。乃呼仲子。同瘞貨郎之屍於竹下。更慮爲犬狼所搯。遂托言失筍。築高垣以圍之。計慮周密。人莫能知。事隔數年矣。一日。仲子賭無資。私伐園竹而市之。父大悲。撻之流血。且將以忤逆控之官。仲子深怵官威。窘極而呼曰。阿翁曷勿用寸鐵斃吾命。仿若人埋之竹園。孰得而知之。其父愈悲。驅而撲之。仲子遂狂呼於市。里人無不聞者。比鄰某甲。與其父素有隙。聞仲子言。曰。異哉斯言。若人果何所指乎。因憶向有貨郎市貨於此。其家尤與之稔。後忽不見。以此測之。得毋爲老特所戕乎。遂具狀邑宰。拘其父子而鞫之。俱不承。某甲證之曰。某日。其仲子爲父所撻。不啻云云乎。宰以問仲子。仲子乃俯首無語。擬之以刑。仍強辯不得實。宰乃移文鄰邑。詢有無某貨郎。以定事之虛實。閱數日。貨郎之弟至。泣陳曰。某年十三齡。兄卽行販不歸。迄今數載。

音信杳然。某又少未更事。不能遠出尋兄。老母望子。血淚盡枯。或存或亡。乞憐而察之。宰聞其弟言。屢加嚴刑訊問。農家父子。奈狡供不一。莫得屍之所。在。因此案懸不能結。逮女到堂。則嫁夫有年。呱呱者在抱矣。宰不之詰。令與父兄同繫一室。獨懸兄之拇指於梁。密遣人潛聽之。至夜分。仲子不能耐。乃呼其妹曰。因汝貪淫。貽禍於父。今復苦我肌膚。汝心何忍。女慙不能答。父呵之曰。汝再耐片刻。我可復生。爾妹亦免爲人笑。何曉曉若是哉。仲子益忿恨。曰。爾父女二人。晏然無恙。而官獨窘我。豈我獨非人類乎。妹亦以溫言慰之。絮語達旦。盡吐真情。不意潛聽之人突出曰。三人均招矣。看汝等尙能翻供耶。及宰升座。三人俱服罪。始得貨郎屍於竹下。其弟痛哭。負骨而歸。宰判父子同械於獄。而以仲子抵罪。其女釋歸。夫醜之。遂與離異焉。

審屠婦奇案

瞿財生。農家子也。學賈於叔父之藥肆中。叔父嗜飲。每日必使財生就對門

屠婦沽酒。時年纔十二。三眉目娟好。屠婦愛其美。輒多與之酒。如是數年。財生十六七矣。屠婦私語曰。若知我愛汝乎。財生曰。知之。曰。然則何以報我。財生曰。不知所報。屠婦笑曰。易耳。乃出酒肉共食。食已。招之登樓私焉。嗣後伺屠他出。輒就之。事極秘密。無人知者。某歲中秋。藥肆中友皆出步月。已而雨作。諸友皆返。獨財生居後。及肆則門已閉。私念叩門而入。必爲叔父所責。正徘徊間。適屠婦在樓上。開窗下視。見財生躑躅街頭。招之以手。財生曰。屠在乎。曰。買猪去矣。乃開門納之。登樓而睡。會屠亦遇雨而歸。呼於門。財生窘曰。奈何。婦曰。無妨。使隨已後而行。匿財生於門側。屠入而財生出。不知也。財生念夜已深。往叩肆門。則叔父怒更甚。乃立簷下。以待天明。俄屠婦又啟窗。見財生猶在。曰。未歸乎。曰。然。屠安在。曰。醉而眠矣。財生因遺帽於樓。用手自捫其頭。且伸手作索取狀。婦曰。諾。未幾。開門招財生。財生入。曰。屠在。招我何爲。婦曰。已殺之矣。財生驚曰。奈何。殺人。婦諱曰。汝手示我殺之。何來問我。登樓。

視之。見屍臥血泊中。問用何刀。曰屠刀。刀安在。曰在牀下。財生卽就牀下。取刀斫婦死。戴帽過歸家中。給其父母。曰頃偕諸友步月行稍遠。距家近。故暫歸省親。父母喜而留之。時有皮匠者。素艷屠婦。而未得聞。天明荷擔出。過屠肆門。見門虛掩。皮匠固知昨夜屠出。而不知其返也。私計屠婦必獨寢於樓。乃拾級而登。見屠死於牀。婦死於地。流血濡其履。驚而走出。歸而閉戶臥。久之。日已出。列肆皆啟。衆見屠戶已啓而無人。呼之不應。入視得狀。又窮履跡所至。至皮匠門而沒。縛而送之官。不勝鞭箠。遂自誣服。越數日。財生至。肆諸友告之。曰對門屠夫婦。爲鄰右皮匠所殺矣。財生曰信乎。曰到官已自承。不久將棄諸市矣。財生曰是我爲之。何誣皮匠爲。叔父掩其口。財生不可。亟赴縣。搗鼓以聞。具述顛末。官曰義士也。末減其罪。竟得不死。

審潑婦奇案

蘇垣葑溪有一潑婦。狀貌甚醜。而效顰過於東施。喜裝飾。塗脂抹粉。撒嬌做

媚日與諸少年狎。狀若妖精。遇之者無不作三日嘔。嘗與某店夥某甲私。月有餘矣。婦探知甲薄有家產。竟自認爲夫婦。逐日登門吵鬧。甲妻出與理論。婦大怒。立批甲妻頰。以爲鵲巢鳩居。若何奪人壻也。甲妻畏其潑辣。無如之何。一日甲正在納悶。婦又誅求無已。反臉角口。面如鐵青色。披髮圓睜。幾類羅刹國裏母夜叉。撞頭甲懷。將與拚命。自是甲躲避他處。婦尋覓不見。不禁忿火中燒。一時氣極。竟自扯其袴。狂奔街上。厥狀類瘋。觀者如堵。時適縣官出署。婦乃挨身轎旁。且號且哭。曰。某店夥白晝強姦良婦。不從被毆。乞官提究。爲婦伸冤。官叱之。左右速之去。婦不聽。攔輿請驗。毫不顧羞。官以爲不吉。命隸按諸地而杖之。杖時。婦人例不褻下衣。今婦一絲不掛。自脫受杖。欲害陷人而適自陷。是亦潑辣之報也。

審悍妾奇案

吳郡有劉某。性極卑鄙。居恆數米爲炊。自子女以及僕婢。蔬食常不得飽。遇

妻尤酷。亦不知親族交友。惟自奉極奢。納一妾張氏。悍戾異常。素喜饗養。劉亦非肉不飽。一日。妾思食鰻鱺。命婢就肆購焉。妾以爲少。疑其竊食。擲其器於地。大罵。婢力白其誣。妾愈怒。命僕捉住。剪其舌。立斃之。蓋婢有國色。劉嘗與狎。妾性本奇妬。偵知之。思置之死地而未發也。至是適觸其怒。乃得償其夙願。婢父控於官。劉行重賄。移其罪於他婢。婢不勝拷掠。遂誣服。申詳上官。秋決有日矣。然劉自是家驟落。妾不耐貧苦。遂與劉謀爲倚門計。劉欣然曰。飢寒至身。不顧廉恥。古人已教我矣。許之。妾雖貌僅中人。然以其工於媚術。故門前車馬常盈。劉感其活命恩。且畏其悍。求所以媚妾者。無不至。一日。購得白描春畫一冊。甫與妾展閱首頁。忽聞叩門聲甚厲。劉大驚。自往啟關。有縣隸數輩。持牒而入。繫劉與妾去。蓋前令以貪墨褫職。新令蒞任之始。甫入署。見門中一兔伏焉。心異之。旣而悟曰。門中有兔。乃寃也。得毋邑中有寃獄乎。是夜夢一女子披髮跪於牀前。張口噴血。似訴寃狀。而口中無舌。恍惚間。

又一女在旁痛哭。移時取一弓。竭力挽開。將射。令驚而寤。晨起。點囚。至婢。婢呼冤。審視其貌。與夢中所見者無異。因思挽弓而射者。得非張字乎。詢之。婢始悉。劉果有妾。姓張氏。立飭役持牒。拘劉與妾。至一鞠而服。遂出婢。而以妾抵罪。劉以同謀行贓論絞。瘐死獄中。

審艷婢奇案

尤某。福建侯官人。曾爲某省太守。時值水荒。饑民有携其子女求售者。尤以五十金購四女爲婢。曰素馨。曰蘭芳。曰水仙。曰玉梅。素最長。玉最稚。蘭與水。年相若。四婢貌頗姣好。自鬻入後。飲食有節。寒煖適時。不數年間。容光煥發。穠纖合度。尤方自幸。代價之廉。而不知斬祀之禍。卽胚胎於是矣。清社旣亡。尤乃卜居於吳王臺。賒下祇一子。名振興。錦瑟年華。丰神俊秀。才固跌宕。性亦風流。維時素馨適屆破瓜年紀。情竇甫開。振興每以眉誘目挑。毫不見拒。一日。振興託病高臥。其母怒焉。憂之。命素馨侍奉湯藥。左右無人。遂得結

歡喜之緣。憐我憐卿。愛情甜蜜。積時既久。適爲蘭芳窺破。振興大驚。恐事敗露。必遭父母譴責。思並污之。以塞其口。會端陽佳節。俗例於此日。家家飲雄黃酒。以爲可解百毒。蘭芳素不善飲。振興使素馨故意勸之。蘭芳勉飲數杯。力不能支。果然玉山頹倒矣。振興乃擁之共臥。蘭芳正當含苞欲放之候。值此宿醉未醒。一經撫摩。自不覺情興勃勃。振興既遂一箭雙雕之願。於心猶不知足。見水仙丰姿斌媚。體態苗條。小妮子嬌小玲瓏。更覺令人可愛。頗有牡丹花下死。做鬼也風流之意。於是必圖一親芳澤。以償素願。某歲冬間。水仙忽得寒疾。日輕夜重。振興朝夕省視。親侍湯藥。問寒嘘煖。倍極殷勤。水仙見其如是多情感。無以報。遂致爲其所惑。光陰荏苒。振興年齒日長。對於素蘭水三婢。狎昵既久。愛情漸薄。斯時玉梅正值妙齡。振興頗垂涎之。三婢亦恐秘密因緣。爲其揭破。乃從旁慫恿。誘之入窰。可免洩漏之患。適尤某夫婦。赴親串家賀喜。留素玉二婢於家。振興託詞未往。令素馨誘玉梅而私之。於

是一家四婢。盡入彀中。然以一人之身。周旋其間。縱具龍虎精神。有時亦難免力竭。況振興當發育時代。祇求肉慾之愉快。不顧精神之銷耗。既卜其晝。更卜其夜。遂致形容萎頓。漸成虛損之症。未幾。振興與四婢輪流宣淫。恣情取樂。忽然大暍一聲。脫陽而死。尤某夫婦聞聲趕至。見子慘狀。撫膺大動。立送四婢於官。問供之下。始悉振興在日。荒淫無度。自戕其身。乃將四婢發落濟良所。此可爲蓄養艷婢者戒也。

審淫尼奇案

尼靜定。俗姓黃氏。其初爲某大家婢。丰姿妖冶。性情淫蕩。第不露絲毫輕狂態。主納之後房。越年。主卒。請於主婦。願披剃爲尼。藉以報主人在日之恩。實則脫羈絆而遠颺耳。主婦喜其誠。爲築庵於近郭。房屋極壯麗。供南海大士像。因名之曰觀音庵。靜定收女徒數人。放縱逸樂。無所不爲。距庵半里許。有祥瑞寺。寺僧甚夥。壯者皆與往來。綢繆無虛夕。然靜定庵門日扃。禁人隨喜。

朝饗夕殮。日倩一貧嫗購辦。此外不再啟門。已與徒非值齋醮。絕不輕出人。因以清淨稱之。鮮有疑其有穢行者。會有某孝廉來宰是邑。見尼庵與僧寺極相近。心竊訝之。詢諸紳衿。又皆力白其孤潔。某乃密遣役日事偵察。歷旬餘。有土工姚三。醉臥庵前。嫗罵不絕。語語皆侵靜定。役聞之大疑。翌日。矯宰命。遍召土木工。獨陰厚姚。醉以酒。詰之曰。汝昨日於庵前。何暴怒。乃爾。姚笑曰。淫禿許我重賂。今悍不與。是以辱之。役佯訝曰。靜師素有清德。何事賂汝。得毋誣乎。姚怒曰。淫禿有何清德。假猩猩惟我悉之。近寺僧衆。皆其所歡。慮人察破。乃以五十緡浼我掘一地道。自某家墳側。直至庵中。凡四十餘丈。號爲方便門。諸僧每夜蛇行其中。淫禿又於朔望。率女徒夜行赴寺。作大歡樂道場。恐我漏洩真情。故加重賂。彼但能欺他人。焉能欺我哉。役得實。卽以白宰。宰召姚至。詳細一切。乃於月之望日。五鼓出衙。詣祥瑞寺行香。旣至。僧急捨棄所歡。匍匐出迎。宰給主僧曰。汝寺僧衆約幾何。可悉告予。予將普施捨。

主僧倉卒之間。以實數對。宰數之。怒曰。何故誑予。主僧稱不敢。宰曰。然則必藐視我之職權。猶在高枕而臥也。卽命役徧索各房。得諸尼於床上。繫之出。宰笑謂主僧曰。阻汝佳會。大殺風景。然世尊則攢眉久矣。主僧頓首服罪。宰命將僧尼盡拘之。而獨不見靜定。詢之他尼。則曰。臥病在庵。實則私產坐蓐耳。亦捕之至。堅不招承。因出姚三與對質。始無詞。旣而得二屍於地道中。則諸僧以妬相殺者。遂定重罪。禡主僧與靜定衣束。以大布使之對面擁抱。如好合然。貯以巨龕。積薪而焚之。

審人妖奇案

燕人邢大。幼失怙恃。年十七。娟秀如美女。有洪某。家小康。具龍陽癖。一日。遇邢於途。目逆而送之。曰。此真尤物。可遇而不可求也。尾至其家。見頽垣敗屋。虛寂無人。邢見洪。陡呈羞澀態。亦若女子之初見良人然。洪見其貧困。不勝憐憫。曰。汝若肯隨至我家。衣食惟汝所欲。邢本一無所能。腆然隨往。洪撫養

周至。邢感甚。一日對面共飲。邢被酒後。顏更媚。洪不復能忍。擁之求歡。邢亦不拒。遂與同宿。從此兩情益密。邢則蓄髮貫耳。作旂裝。儼然美女子也。且習女工。刺繡甚巧。洪益嬖愛之。惟好男色者。必病股與目。況旦旦而伐之。豈有不速斃者乎。如是三年。洪精力枯耗。兩目既眊。而半身亦不遂矣。先是洪有契弟劉某。恒至洪家。與邢相見。洪詭言爲己之表妹。劉見其媚秀可愛。值洪病革。劉願以重聘求邢爲妻。洪與邢謀曰。我病不復能起矣。汝習女裝。聲容舉止。宛然相同。本願偕老白頭。不意半途長別。言次。淚下如珠。又言曰。今劉子愛汝。不妨嫁之。我得財禮。可藉以飾終。而汝亦得其所矣。邢曰。我非真女。彼娶而覺之。能相容乎。洪曰。世無不好色者。彼若覺察。汝須竭力獻媚。既獲寵愛。決無憤事。況劉之性情。與我相類。故願以汝托之也。邢始允諾。洪以告劉。遂邀媒行聘。擇吉娶歸。劉父母見新婦。婉孌柔順。交相慶慰。劉更欣喜。欲狂。至晚入室。擁入衾中。邢仍曲舉其股而受淫。故絕然不覺也。相處已久。

劉必欲盡去邢之上下衣。至是無從隱瞞。劉乃大駭。邢擁劉極盡媚術。而實告之曰。爾若舍我。恐女子中未必有勝於我者。劉曰。我固不忍舍汝。但我娶妻爲嗣續計。汝不生育。我家又無餘資。可以再娶。不將誤我後嗣耶。邢曰。我能看香治病。爾倩人畫一女仙像。供養堂中。將仙人附體治病。若何靈驗之說。傳播人知。自能使人金錢。入我囊中。屆時任買妾媵。不爾禁也。劉首肯之。自是人之求女仙治病者踵相接。惟劉發財心切。告於父母。願往附近鄉村。傳播仙姑治病之術。人見以美婦行醫。爭相延請。一日。有一番役。垂涎邢色。詐病喚之去。甫入室。出其不意。擁至床上。而撫其下體。居然偉男子也。役大駭。縛而訊之。邢哀求包容。願任雞姦。而多與之賄。役曰。村中不乏美女子。偷容爾在此。恐皆不得爲完人矣。且我獲妖人。官賞必厚。豈願貪汝賄賂。自貽伊戚耶。併獲劉某。送官審究。邢以妖人例。卽行正法。劉則發配黑龍江完案。

審犬姦奇案

江北某村有商人某甲。經商於外。恒數年始一歸。家惟姑媳二人。相依爲命而已。姑年老力衰。不慣操作。諸事悉由媳婦爲之。惟姑防範殊甚。深恐婦或有外遇。以爲門楣羞。故特禁其歸寧。而居處又復寥僻。幾如獨家村然。差幸家無擔石儲。可免宵小之垂涎。間數日。姑一往市鎮購物。必反扃其戶。慎防之也。婦素性輕浮。自適某甲。以甲經歲作客他鄉。香衾辜負。絕無燕婉之私。故每於月夕花晨。自傷命薄。姑微有所聞。防範愈嚴。顧婦乃鬱鬱寡歡。頓欲擇人而私之。而所居又貼近姑室。爲出入必由之所。且未及亭午。柴門已扃。卽涉遐想。亦惟有付諸夢幻而已。姑常蓄一牡犬。以代司閤。所以防匪人之突如其來也。犬形極龐大。毛作黑色。目光炯炯。狀殊威猛。見人來則窮追而噬之。惟於家人則貼耳馴伏。雖朴責之。亦弗遁也。入夜吠聲狺狺。常達戶外。賴此得以無恐。婦以其善伺人意。愛之特甚。遂日具肉食飼之。犬得飽食。常追隨婦之左右。婦益與之暱。一夕抱犬臥於榻。竟與之通。儼以夫目之。犬亦

能曲隨婦。意每於人前。尾之不稍舍。姑以爲婦於百無聊賴中。弄犬爲伴。故不之疑焉。自是每至黃昏時候。犬卽隨婦入室。不復聞狺狺之聲矣。未幾。姑患病甚危。婦致書於甲。促其歸里。及甲抵家而母已逝。入夜。與婦同寢。一叙闊別。犬忽一躍登床。猛噬甲之喉際。霎時氣絕。婦駭極。秘不以告人。草草埋葬。託言急痧暴亡。惟婦終不能自遣。未幾。竟再醮於某乙。乙固村農。中年喪偶。成婚之日。賀者盈門。及夜。闌客散。解衣就寢。甫交數語。犬忽由床下突出。究不知其何時溷入也。猛咬新郎之勢。恨恨大嚼不已。時室外之人。聞乙呼聲。絕慘。奪門而入。則見地下血水遍染。乙僵臥其中。撫之氣絕。婦則木立乙傍。飲泣不止。犬見人來。衝戶而出。衆人未及注意。以爲婦謀殺無疑。執送之官。逼令婦供。婦終不承。忽庭外喧嚷聲大作。蓋犬又伏婦身下。雖鞭撻之。亦不去。衆始知乙之死。必與此犬有關。至是。婦遂直認私犬不諱。又謂某甲之死。亦爲此犬咬斃也。聞者無不駭愕。官以事情奇怪。遂以犬論抵。婦則禁錮。

終其身。

審龍陽奇案

鄞江羅生。態度風流。容顏姣好。見者罔不爲惑。同邑有陳某者。商賈中人也。富於資。與羅相遇。悅其美而愛之。邀至家。欸以酒食。殷勤倍至。臨行。復贈以香珠金鐲等物。羅心感之。暇輒一來。久而狎暱。陳挑以微詞。但笑而不答。遂擁之而私焉。陳妻某氏。羅以嬌呼之。有女秀姑。年十六。常在外祖家。故羅未嘗見焉。一日。秀姑返。值陳他出。陳妻與女徐步階前。看池中紅蓮。花開並蒂。時適羅來訪。陳見女螓首蛾眉。天仙不啻。不覺心神爲之搖蕩。向前揖曰。嬌叔往何處乎。陳妻曰。甚風吹汝來。汝叔他出矣。請姑少待。顧謂女曰。此汝義兄也。女略睨之。引身而避。故遲其步。回眸微笑。望室東小閣而入。伸手垂簾。潔白如玉。羅益傾愛之。入室就坐。與陳妻作家常話。問曰。秀妹婿家伊誰氏。陳妻曰。鄭氏。語甫畢。女忽於窗間露半面。問曰。未知哥哥聘定誰家之女。羅

喟然曰。不幸室人未嫁而夭。故某今年十七。猶鰥居也。陳妻曰。惜已晚矣。否則秀姑真堪匹配。羅聞之。黯然欲泣。陳妻亂以他詞。始面有霽色。女乘羅與母語時。屢以秋波示意。羅益覺顛倒。未幾。陳歸。見羅喜極。卽命妻治具留飲。未終席而大雨如注。羅遂宿於陳家。挑燈共話。其樂無窮。陳忽患腹痛。先往就睡。命設榻臥羅於東廂。時羅已薄醉。解衣就枕。相思縈繞。念女之臥室近在伊爾。何不潛往窺之。乃披衣起床。輕啟其戶。遙見女室燈光猶明。及走至女之室外。用舌舐破紙窗。向內細窺。則見女手支頤頰。倚几危坐。若重有所思者。羅情不自禁。微叩其戶。女覺而啟之。見羅至。不勝欣喜。問曰。哥哥何以深夜來此。羅曰。自見芳容。相思欲死。冒昧而至。幸求垂憐。女曰。男女有別。兄妹亦當遠嫌。急出則已。不然。將執告父母。羅大戚。屈膝於地。淚下如雨。女殊憐之。扶之起。羅遽擁之。遂相燕好。忽忽年餘。嫁期已近。一夕。女謂羅曰。妾身既屬於君。斷無再嫁之理。今孽期將屆。妾志已決。惟拚一死而已。羅曰。卿死。

吾豈忍獨生。惟願死後同穴。相從於地下耳。自是二人情好愈密。一日。羅方與女調笑。忽爲傍人所見。密告之鄭。鄭聞而大怒。曰。未嫁女子。而與年輕男子相戲謔。其有姦情可知。乃具狀告於邑宰。請求拘訊。并願離異。宰得狀。見詞有云。羅某恃其擲果之貌。慣爲奸僻之行。因笑曰。措大以潘安比之。母乃唐突古人。及拘提到案。則男女皆神仙中人。心頗憐之。羅俯伏涕泣。恐懼不可名狀。女則神色自若。以紅巾代羅拭淚。曰。事已至此。徒作楚囚何益。遂供曰。羅郎本無戲妾之心。緣妾酷慕風雅。不能自持。遂致沉迷慾海。干犯禮教。五刑三木。應加妾身。無與羅郎也。惟一念之差。畢生莫贖。倘蒙大人垂憫而矜全之。自當生生世世。啣結以圖報。宰笑曰。女子一念貪私。遂喪終身名節。猶幸直供。暫免刑責。轉訊鄭翁。曰。據爾訴詞。謂陳女不潔。情願休棄。然乎否乎。鄭翁曰。然。復問羅曰。汝曾娶妻否。答以未娶。而天宰曰。幸有此耳。遂判曰。陳氏女開戶而引狂童。情固可醜。羅氏子踰垣而摟處子。狀亦堪憎。雖云

兩小無猜。犯有不覺。然而揆其情罪。法豈能寬。但念羅子妻亡。陳氏夫棄。與其分而失所。何如合則得依。俾訂絲蘿。永偕伉儷。既可掩前之醜。抑亦補後之過。用特破格矜全。量情判斷。陳女卽爲羅婦。羅子卽爲陳壻。至陳某帷薄不修。致有閨門之玷。是宜歸還財禮。俾其另婚名門。此判。判詞旣下。遂令羅生與陳女當堂花燭團圓。一時觀者。無不頌宰之法外用情也。

審漁色奇案

浙東有某生。美少年也。爲某方伯之公子。日事揮霍。且好漁色。惡其妻貌不揚。納妾又不能如願。乃流連妓館中。久之。家財耗去大半。遂至金陵。因友人之介紹。爲某銀樓司會計。主人爲一老翁。居眷屬於店之樓上。年邁無子。納一妾爲嗣續計。而妾年近花信。素性輕狂。憎翁衰老。久蓄異念。覩某生。頗屬意之。生亦豔妾貌美。由是兩心相印。惟恨無機可乘。一日。翁因事往滬。妾

卽密示意於生。約往某旅館爲巫山之會。不料春風一度。暗結珠胎。而翁未之知也。逾十月。舉一女。翁殊不滿於心。後經旁人勸慰。以先開花後結子之說進。翁意始釋然。乃命名曰招弟。女貌酷似某生。右足有六趾。於是人言藉藉。爲翁所聞。生知事不妙。急辭歸。翁以醜聲外揚。不如遣去之。乃賣妾與某布商爲妻。卽以所得之洋。爲生女衣食之費。命携之去。某生自與妾別後。情猶戀戀。屢遣人探問。而未得確耗。久之。亦遂惘然。歲月不居。流光如駛。忽忽已十餘寒暑矣。而生漁色之興。猶不淺。頗以家居岑寂爲苦。携資往揚州。寓客旅中。詣平山堂游焉。歸途遇一年方二八之麗姝。注目良久。心頗訝之。後詢諸館役。知爲某名妓。立至該妓館。招日間所遇者。侑酒。一見如舊相識。遂止宿焉。兩人備極繾綣。訂白頭之約。及細詢姓氏籍貫。方悉爲某翁妾所生。潛驗其右足。果符合。忽萌羞惡之心。卽將所藏小刀。出妓不意。直向其咽喉刺下。霎時斃命。生方欲遁。爲妓館中人所覺。卽縛而送之警署。告以殺人事。

卽由警長移送於縣。旋經承審官訊問。生直供殺人不諱。詰其何故殺妓。則堅不吐實。但請按律治罪而已。承審官以某妓之死。雖知爲生所殺。然未得生謀殺之情由。恐其中別有他故。未敢輕於定讞。姑且羈生獄中。再行審問。生在獄日夜飲泣。粒食不進。發函招其子至。其子有乃父風。日惟徵逐於花柳場中。至則生已奄奄待斃。生見子。歷述己之一生。及殺某妓之由。并痛戒其子。速改前非。毋效老父之所爲。言畢而逝。生之家中。自生死後。妻與媳皆有外遇。醜聲四播。爲人不齒。此可爲好漁色者之報也。

審捉奸奇案

杜子幼牧。翩翩年少。倜儻不羣。同里某富室。延之司會計。蓋中表親也。運籌握算。條理分明。逾年。富室主忽罹時疫。暴亡。僅遺少婦。並無子嗣。族中莫不覬覦其財產。爭欲入繼。婦婉言却之曰。未亡人年未二十。若繼幼嗣。不善撫育。若繼長者。恐貽口實。請俟數十年。得爲老婦。則惟命是聽。族人見其理正。

詞直無可駁詰。遂息爭。然知其少艾。必不能安於其室。將乘隙以圖之。乃賄其僕婢。日伺其隙。一日。婦在後花園中。斜倚亞字欄杆。對花欲泣。適杜閒暇無事。散步園中。踏花街。穿曲徑。遙覩婦雙眉微蹙。知傷心人。固別有懷抱也。婦見杜來欲避。杜涎之已久。今日見婦獨在。機不可少。遂以語挑動之。後至一軒。軒旁有沼。沼中鴛鴦成雙。作對交頸而眠。杜指示婦。婦桃腮泛赤。杏靨含春。情已不能自持。杜默知其意。遂擁婦求歡。婦亦不拒。就榻私焉。始猶數日一會。繼則日同寢處矣。族人得悉真情。約其僕婦爲內應。闖入寢室。時杜與婦正裸臥。不及遁。族人遂連臥具捲而縛之。事聞於外。杜妻得信大恐。亟叩某訟師之門而求救焉。訟師曰。捉姦捉雙。今已捉得雙矣。何從置喙。但能從吾計。尙有一線可爲。杜妻曰。生死惟命。訟師乃囑婦被髮毀裝。喚健婦扶而去之。時夜漏三下。晚衙已閉。執姦者至班館。館人謂須俟早衙呈報。於是安置杜與婦於密室。羣坐外室。以待天明。訟師持重金。偕杜妻飲泣而入。役

識訟師。僉曰：先生何爲暮夜至此？訟師指杜妻曰：是爲予妹所執之男子。卽其夫也。妹誤謂殺姦，則其夫已死，痛不欲生。予曰：執姦者爲族人，焉敢殺人？妹不信，必欲一覩夫面。予故偕來。語次，卽以重金授役。役笑曰：旣爲先生妹，請至披室觀之，無妨也。健婦扶杜妻入，未幾，天已破曉。傳呼放衙，訟師亟呼妹出，仍密髮掩面，喚輿送歸。無何，縣官升座，訟者入告。命役將杜與婦入幃，給衣。杜出，官詰之曰：儒者作姦犯科可乎？杜曰：夫婦居室，人之大倫，何謂不可？官曰：得毋被執者是汝妻耶？杜曰：然。官曰：安得同宿於某家？杜曰：我與某家至戚，向爲司事。戚某暴卒，其婦少寡，我以別嫌，是以偕妻同居。不意族人誤執也。遂喚杜妻出，衆見非婦，氣餒而不敢辯。乃杖族人而釋杜夫婦。實則杜妻之披髮毀裝，卽爲與婦調包之計。呼放衙之時，訟師呼妹出而喚輿送歸。此卽富室婦之脫身時，族人昏昏未及注意，是可見訟師之惡，非常人所可逆料也。

審謀產奇案

直隸有陸氏。弟兄二人。長名伯達。次名仲由。析爨而居。仲無行。遺產蕩然。賴伯友愛。時賙濟之。伯年逾知命。膝下僅一子。年甫弱冠。娶妻崔氏。小字再鶯。迷好甚篤。一日晚。仲妻以急逋故。求助於伯。伯子方從市中歸。腹苦飢。時再鶯適晚炊。伯子向之索蔬飯。食之。七竅血暴湧。逾時而卒。再鶯惶恐失措。奔告翁姑。相持慟哭。幾不欲生。仲妻在旁哭泣。厲聲謂再鶯曰。伯年半百。止此一脈。今無辜暴死。爾不能辭其咎矣。若置之不究。其何以慰死者於地下乎。予夫婦忝在期服之親。決不能爲爾稍貸。歸訴於仲。遂偕伯夫婦共鳴之官。竟控再鶯毒死親夫。官使作作驗之。確係服毒致死。乃嚴刑拷掠。再鶯以荏弱之體。不能耐三木。遂誣服。因奸謀殺。並指中表親陶信恭爲奸夫。陶素行不苟。拘至案下。因畏刑故。亦直承不敢辯。爰書已定。將付大辟。會某明府蒞任。某固幹吏也。聽訟爲一時之冠。細覈歷年案牘。厚幾盈尺。及至是案。覺

其中情詞實有可疑。爰命拘案中諸人。隔別細研。見再鶯與陶信恭。均辭氣溫和。不類殺人者。益信其冤。又訊伯夫婦。僉謂媳婦崔氏。自入門後。事予二人甚孝。夫婦之間。亦未嘗有詬誶聲。且並未見陶之足跡。往來吾家。有無奸情。不敢懸斷。訊至仲妻。則厲聲哭罵曰。賤婢以奸斬伯氏之嗣。不付大辟。不足以慰死者。言時。詞色悍暴。狀非良善。明府諦審久之。忽拍案叱謂仲妻曰。下毒者非他人。卽汝是也。汝毒猶子。奈何誣崔氏乎。仲妻失色。極口叫屈。明府大怒。命嚴刑拷之。不肯遽服。時方冬月。白日跌訊。至漏三下。猶未吐實。夜半。忽陰風慘慄。屋瓦飛鳴。滿堂燈燭。幽綠如螢。衆見一大蜈蚣。長二尺許。蜿蜒由戶外馳入。仲妻禪中。衆詫爲異事。急命禪。搜之不得。明府知爲冤鬼作祟。更命加刑。仲妻知不可掩。乃盡吐其實。蓋仲妻久窺伯產。每至伯家。必懷砒少許。欲伺隙投之。是晚。恰值再鶯晚炊。矚其無人。遂潛下焉。本欲酖伯一家。及伯子以飢先服斃命。乃乘機嫁禍於再鶯。計亦狡矣哉。爰以仲妻抵

罪。又以陶信恭無辜被累。入贅伯家。以再鶯妻之。而嗣爲伯後。

審哺乳奇案

池陽有黃姓姊妹。自幼相親相愛。既嫁。各有娠。指腹約曰。均是男。均是女。則已。脫一雌一雄。當締姻好。僉曰諾。且誓之以堅信。既產。姊雄而妹雌。皆大歡喜。各申舊約。南山不移矣。無何。姊夫爲仇家牽累涉訟。所有產業。蕩然無存。竟抑鬱而卒。姊無以自活。不得已。携子往依其妹。時妹已有子入塾。卽留姊子伴讀。先是約婚時。固無媒妁。不數年。兩小俱已成。人妹夫憎姊子貧。謀於妻。欲諱前說。乃以女字同邑富家兒。嫁有日矣。而女實不知有舊約也。妹使姊爲女作嫁衣。姊知妹負約。自顧家貧。敢怒而不敢言。對女時。時淚下。女察知有異。叩之曰。姨與母兄弟也。兒視姨猶母。姨亦當視兒猶女。兒聞男婚女嫁。人之大倫。兒嫁有日。此一生大事。姨當爲兒喜。何哀之甚也。敢請其說。姊第搖首而不肯言。女固叩之。乃拭淚喟然曰。兒不知耶。兒固吾子婦也。今已

矣。夫復何言。女聞之。大驚失色。窮詰姨。得其顛末。沈吟久之。曰。噫。吾知之矣。姨於明日。須托故暫回家。摒擋一切。倘父母使之來招。固辭以疾。俟兒自來。姨家再作計較。姊如女言。翌日與妹話別。堅訂三日必返。妹以女嫁期已促。須姊代爲理粧。及三日。姊不至。屢使人往招之。俱以疾辭。固招不至。姊心益急。女乘間曰。阿姨素憐愛兒。非兒自往招之不可。妹笑曰。老賤人自高身價。須小妮子自往捉來。然期已迫矣。兒須速偕阿姨歸。勿貪頑也。女曰。諾。亟懷金而往。訪知近村有貧婦新分娩者。女以千金付姨。悄然往說貧婦。願假嬰兒。代哺一月。貧婦允之。姨抱嬰兒歸。竟無知者。女計父必自來促歸。令姨閉門以待。妹以女多日不歸。果使夫自往促之。至姊家。叩門良久。姊始出開。亟問曰。吾女何在。姊笑以手反指曰。坐牀者非耶。女父至房中。見女蓬首擁被坐牀上。解衣哺兒乳。見父故作羞縮狀。面堅默不作一語。女父瞪視失色。不知是計。頓足歎曰。奈何。奈何。急趨歸。具以告妻。相對愁歎而已。一時里黨傳

爲笑柄。富家聞而恥之。亟倩媒退婚。索還聘物。女父母以女貽門戶羞。暫令住於姊家。俟彌月後。徐爲之計。比及匝月。貧婦自往索兒。女詫曰。汝以十金鬻兒於我。何又索還耶。貧婦怒曰。汝原約假我子代哺一月。焉得不還。我豈鬻子者耶。彼此反唇相稽。女故靳不肯還。貧婦益怒。亟鳴鼓訴之官。官拘女至。女乃泣陳所以。官肅然起敬。曰。以智全節。真奇女子也。拘女父與姊子至。見姊子溫文爾雅。卓爾不羣。詢知尙在塾中攻書。大喜。復叱女父曰。汝以一女而字二夫。罪不容逭。姑念汝女賢。貸汝過。又指姊子謂女父曰。此誠快婿。速歸。好助奩資。爲二人合卺。以贖汝過也。女父叩首唯唯。女乃以嬰兒還貧婦。一重公案。至是始了。

審投河奇案

粵東楊生。聘某氏女爲妻。女姿首絕佳。偶出觀劇。被爲富不仁之某甲所見。重賄其母。得與女通。秘密殊甚。猶恐旁人窺破。乃於女之臥榻下。穿一地道。

通後院密室。爲潛逃之計。未幾。楊生入泮。遣媒訂期成婚。甲乃與母女二人設謀。使楊入贅而斃之。母女皆諾。告媒曰。壻家無父母。老婦亦無夫無子。入贅吾家。各得所依。未知壻於心願否。媒以言告楊生。楊欣然願贅。擇吉於清和之月。完姻時。男女賀客盈門。無不嘖嘖稱羨。楊喜甚。安排衆客入席。卽歸新房。與女對酌。見女容光煥發。艷麗無雙。心中更爲愉快。女執杯相敬。楊連飲數觥。不覺玉山頽倒矣。時外間衆客歡呼暢飲。正當興高采烈。突聞新房中慘呼一聲。新郎拔髮覆面。跳躍而出。衆欲詢之。已狂奔向外而去。衆追隨里許。遇一大河。新郎卽躍入水中而沒。衆呼漁舟撈救。歷一日夜。不知屍之所在。衆乃歎息而返。母女形皆惶急。候於堂中。問衆客新郎何往。客告之故。並詢其由。女曰。頃在房中筵宴。新婿忽發瘋狂。奪門而出。我駭甚。手足無措。以爲外間諸親友。必能阻之使歸。何意其投河而死耶。復泣曰。是客殺吾夫也。衆乃共商而報之官。官訊客皆曰。吾等猝不及防。追之無及。事出意外。豈

有至親好友。見死而不救哉。訊諸女及母。則哀求尋還屍首。官至河干驗勘。蕩蕩大河。流長源遠。無從尋屍。遂懸爲疑獄。越年餘。新官蒞任。翻閱舊卷。見是案。反覆推求。恍然曰。壻投河而反誣客。非誣客也。欲客證新郎之死。以實其言也。中必有故。乃微服出訪。得女之鄰人語。謂有富室某甲。素非親戚。常往來女家甚密。吾儕頗疑之。但是日新郎投河。衆目睽睽。決無有他。官曰。汝見之否。答曰。我亦見之。思之可怖。官曰。汝見新郎之貌。作何形狀。答曰。因披髮覆面。故不及見。官又點首問曰。富室安在。答曰。今日猶見其入女家也。官返署。易服率健役數十。突至女家。包圍前後門。飭役搜之。僅有母女在室。問官欲何爲。官不答。舉步將入閨闈。女母橫身阻曰。此嫠女室。三尺童子尙不許入。安有爲民父母而不知禮乎。官微哂曰。欲爲汝壻明冤耳。母曰。倘入室而冤不能明。將何如。官曰。我償汝壻命。乃入女室。見鋪陳精潔。皆常用器具。絕無可疑者。正躊躇間。俯視牀下。得男子履。排列成雙。回顧女面如土白。飭

令將牀移去。見地板有新墊者。舉之。係一地道。拾級而下。至一密室。則富室某甲。伏於室隅。命拘執之。推門至院落中。地上泥土有新挖痕。命役掘之。有屍在焉。屍身經年不腐。喉間扼痕顯然。遂盡集案內人證。嚴刑訊鞫。始知楊醉後。被女與某甲共扼其喉而斃。從地道中。昇入後院埋之。投河之人。係富室。以重價覓善泅水者爲之也。乃將女與某甲。論抵如律。人心爲之大快。

審煮鷄奇案

紹郡有張某者。素業商。出必數月。家惟老母與妻同居。一日。母患病。思食白煮鷄。婦宰雞烹之。及熟。就砧上切割。念姑年老齒落。其鷄未知煮爛否。因取一醬嘗之。適姑於房中喚婦。婦欲應。而鷄方在喉際。不能出聲。氣塞而厥。姑屢喚不應。扶杖出視之。則婦已死矣。疑中惡所致。治之不醒。時當盛暑。婦之母家。距離既遙。而子又遠出。惟恐暑氣薰蒸。婦屍腐潰。遂賒薄棺而殮之。次日。人昇往田間。孰知昇者。震動屍身。鷄肉由喉際漸下。氣息漸轉。至黃昏時。則

霍然而甦。婦啓目視之。不知身在何所。奮力往上一頂。棺蓋去矣。伸首四顧。寂靜無人。乃坐於棺傍而泣焉。適某寺僧與木工馬四提燈而歸。聞啜泣聲。走問之。婦以實告。僧舉燈矚之。見婦有殊色。思欲携歸。遂密與馬商。誑婦曰。此去與汝家順路。吾引汝歸可乎。婦喜。同行里許。路經馬之兄家。馬知兄舉家外出。頓起毒謀。託言口渴。略事休息。卽行撥關而入。時已夜半。入廚下烹茶。僧方與婦語。馬遽拾柴斧奔出。向僧盡力擊之。腕裂而斃。馬乃向婦低語曰。汝從我乎。否則亦請嘗此柴斧。婦懼而從之。飲茶畢。挾婦而遁。明早。鄰右見門洞開。入內察之。一僧被殺地下。報官請驗。時僧之徒聞師被殺。而馬不回疑。馬圖財害命。亦控之官。官命嚴緝。馬四不獲。案懸未結。張某忽歸家。見妻死而屍亡。再四訪尋。杳無影響。及秋。其夥李某邀張出外貿易。張以母老辭之。李迤逦至台州。見一家門傍河干。有婦淅米。面貌酷似張妻。心異之。次日潛身僻處細覘。果爲張妻無疑。詢諸旁人。則曰捕役許某家也。李乃遄歸。

告張。張卽偕李及妻父同往。伺其妻出。遽擁至縣控之。官訊婦。婦供死後復甦。被馬脅迫。逃至天台。投親不遇。輾轉至台州。因貲財用盡。遂投許家爲傭役。許屢欲私我。我不從。一日。馬隨許出外緝賊。後許一人獨歸。言馬已溺死水中。及夜。縛我而強姦之。聲言如再不從。必將我殺死。我因畏死。從之。已數月矣。訊許。供詞相同。惟於馬四死狀。堅不吐實。官命用嚴刑鞫之。始供馬係異鄉人。知其無親戚根究。故誘之偕出。乘間以斧擊斃。而佔其婦焉。官命率衆同往驗馬屍。婦見馬傷痕宛然。與砍僧之狀無稍異。遂處許死刑。以婦屢遭脅迫。情殊可憫。命張領歸。數年疑案。一旦始白。馬之報應昭彰。而張母之歡喜可知矣。

審試心奇案

琴川梁某。素業商。娶王氏女爲室。女方少艾。伉儷綦篤。閨房之樂。勝於畫眉。結褵月餘。卽挾資赴京師。臨行之際。妻爲之設餞。梁依依不捨而別。旣抵京。

刻意經商。閱數月後。始與家中一通音問。然因妻孤燈獨守。終不能釋。然於懷。店中夥友甚多。其中良莠不齊。見梁妻年輕貌美。百般調堪。日以爲常。梁亦魂夢相依。苦思不置。光陰似箭。日月如梭。忽忽已三易寒暑矣。梁意漸淡。日與朋輩獵艷尋芳。眷一妓。聊解客中寂寞而已。居數載。忽思歸家。既抵里門。頓起疑竇。私念久客在外。妻或不貞。必得有以試之。因伏於門側潛窺。見妻談笑自如。一若不以夫爲念者。於是疑心愈甚。以爲妻必有外遇。試妻之心更決。俟夜靜。以土塗面。踰垣入室。妻方支頤粧臺。卜金錢爲戲。回首見梁。至大駭。梁佯誘與狎。妻堅執不從。遽行強暴手段。妻大怒。取利剪刺梁。要害而死。細燭之。乃夫也。不禁大慟。搶地呼天。暈絕復甦。繼思謀殺親夫。罪當凌遲。事已如此。知不可掩。遂指縣自首。官以塗面誘姦。出乎理外。妻不知是夫。拒姦致死。貞節可嘉。乃不問。反爲之請旌焉。

田舍翁某。年四十。生一女。乳名愛兒。愛之如掌上珠。字於同里農家子。謂相距密邇。便於往返。無何。翁妻卒。女纔十齡。受育於嫂氏。以其愁穉貪嬉。戲嫂甚厭惡之。平時常相惡謔。且以語恐之曰。聞汝壻與汝年相若。其勢已甚偉。將來齒日增。更不知何若。日後汝嫁去。吾甚爲汝危之。看汝猶能嬉戲否。嫂平居與女相對。輒道及此。愛兒聞之。甚以爲懼。不數年間。女已及笄。嫁有日矣。嫂猶時以爲言。愛兒竊自計曰。誠如嫂言。吾命休矣。幸距家不遠。脫有危。姑遁歸。再作計較。未幾。桃夭期屆。綵輿臨門。嫂固不喜愛兒。當此吉期。故以不祥之語咒之。便挈女手。佯爲悲泣。送之曰。阿姑須珍重自衛。但願人言不實。則我與汝相見。猶有日也。愛兒甚感嫂氏多情。倍覺懼怯。是夕。合卺後。賓客既散。新郎酩酊入。解衣就寢。欲圖巫山之會。愛兒謹誌嫂言。給之曰。爾我夫婦。爲日正長。今日適有小恙。一俟全愈。惟君所欲。新郎聞而憐之。愛兒伺新郎睡熟。託言洩溺。潛開後門。將竄歸。謀之嫂氏。轉達於父。願長侍膝下。以

全性命。天明新郎醒。呼女不應。急披衣起。覘之。闌無其人。大驚而呼。家人咸興。知新娘開後門竄走。急遣人往翁家問之。云。昨方吉期。何得遽歸。彼此驚訝。莫測其由。惟嫂氏心知有異。默笑不言。是夜大雪盈尺。共遵雪跡尋之。道旁故有一智井。羣議暮夜獨行。雪光迷炫。保無失足墮落。乃縋一人下井。窺視果有一屍。大駭。意必是女。及拽起。乃一僧也。顛項劈裂。血痕猶新。衆人益深駭愕。遂愬諸官。窮極研訊。卒無朕兆。越五載。翁至豫經紀。路過一市。見一賣酒家。有女方在門首梳髮。酷似愛兒女。見翁至。大驚。急趨翁前。抱持而泣。告之故。蓋隨施某來此。貰酒營生。頗稱小有。翁佯爲大喜。俄而施至。女使拜父。居然稱翁壻焉。情甚親暱。問訟事結未。給以早結。農家子已別娶多年矣。施乃放心。翁便諷女偕施歸。女謀於施。施以爲無事。遂治裝焉。翁既到家。卽密詣縣具狀。遣隸拘施至。訊得顛末。其案乃結。先是愛兒夜竄時。因雪迷失。路墮智井中。呼救。某寺僧方晨出募齋。聞知女子聲。正將縋繩下拽。忽遇施。

施故里中無賴。夜博方畢。過此見之。遂與僧同拽起。悅女之色。欲挾以私奔。慮僧敗露。乃乘其不意。取扁杖當頭力劈之。僧痛極仆地。施卽投僧井中。然後以言脅女。偕遁至豫。竟成夫婦。官乃斷以施抵僧罪。愛兒仍歸原夫。以嫂氏謔語起釁。令批其頰。以示薄懲。人皆稱快。

審柴室奇案

有王小文者。素行佻。專事尋花問柳。獵艷偷香。故頗有風流之名。有表妹某。年十七。貌麗如花。而性情亦輕蕩。遂私焉。年餘而人不知。表妹之父與叔。爲同胞兄弟。其祖後又納妾。生一子。家故富。平時兩兄耽耽視弱弟。因之乃祖亦仇視其二子。後表妹已遠嫁。王與之睽隔數年。無由相聚。及庶叔年稍長。祖爲之畢婚。諸親咸集。王小文亦蒞焉。伺於門。表妹乘車至。彼此渴驥奔泉。入室略寒溫。卽携手至柴室狎褻。情急未曾閉門。適庶叔如廁。突然遇見二人。恐其洩漏奸情。於顏面有關。遂以帶勒斃之。埋於積柴中。事畢。仍逐伴

笑語。揚揚如無事。迨彩輿臨門。遍覓新郎不得。合家大噪。遠近尋訪。王小文與表妹亦佯作張皇失措狀。朝夕搜求。數日無耗。久之。穢氣自柴室出。得屍於柴內。頸有繩痕。疑兩兒謀弟所致。其父亦述其平時閱牆狀。乃縛以鳴官。窮治經年。毒刑備至。已誣服矣。會新令尹至。閱供詞而疑之。以爲兩兒謀弟。何時不可。奚必待新婚之日。衆親畢集時耶。且不於暮夜。而於白晝。其中必有別情。非細鞫。慮有冤抑。乃大索。是日賀喜者。隔別研訊。有一鄰人業圻者。最後來賀。官詢曰。汝因何事遲至。以早間代人檢屋漏對。再詢曰。汝在屋上望見其家否。曰。望見。又詢曰。有他事望見否。曰。見王小文與新郎之姪女。携手入柴室。意甚相暱。隨見新郎手中執紙。過柴室門而登廁。我適整瓦畢。遂下屋。易衣往賀。他無所見也。官曰。得之矣。遂拘王小文及表妹。至一訊而服。乃置之法。

南通顧艷芝名家女也。聰慧絕倫。斌媚無比。性嗜葉子游。結閨中女伴。往來無虛日。興之所至。秉燭夜戰。幾不知東方之發白也。父兄家教素嚴。母則溺愛甚。同邑問字者踵相接。皆不許。南城夏雨時。風度冠絕一世。悅女美。遂委禽焉。既婚。伉儷甚篤。惟與葉子闊別久。技癢難熬。隔旬日。必託故至母家。伺父兄他出。約舊侶一暢所欲。雨時館於外。不恒至岳家。以故數年得不洩。會秋試。雨時將行。淚泣話別。囑艷芝好事姑。勿戀戀母家。女諾之。及雨時甫解纜。就道。女卽肩輿逕歸。適父兄亦往應試。女膽愈壯。晨昏團坐。惟恐或輟。晨起。卽遣媪走延客。女伴缺。則以男子承其乏。但得琴中趣。不顧李下嫌。於是城中少年。多假葉子爲介紹。冀得親近玉人。而物議從此拂騰矣。及秋深。雨時試畢歸來。登堂見母。訝問婦何在。母具述之。雨時大怒。奔至岳家。甫入門。卽聞錢聲錚錚然。葉子聲察察然。男女歡笑聲紛紛然。愈大疑。就門隙窺之。見女與三少年同席博。且有作壁上觀者。拍女肩指點。狀甚褻。雨時不禁忿。

火中燒氣爲之塞。體爲之冷。木立一時許。欲前復止者再。私念勸無用。控無證。乃大步歸。袖利剪復往。叩門直入。女方得采。笑容可掬。猝見夫至。慚而且懼。戰慄不能聲。幾無置身之地。衆亦驚起欲匿。雨時立階前。笑以鼻曰。好！好！女母挽雨時入。欲爲女辯護。囁嚅不能吐一字。雨時遽出剪自刺其喉。衆力奪已深入寸許。血溢不可止。仆地而卒。衆奪門欲遁。女母遮之曰。諸君不能奪其剪。致愛壻死於非命。今欲趨避。將獨坐小女以凌遲罪耶。死則偕死。逃則不可。衆正窘急。無以爲計。女之父兄施施入。見壻死狀。詫問故。女母泣告之。且求父有以庇女者。父叱曰。無恥女。尙可留耶。言畢。反扃其戶。叱二僕守之。逕詣縣。請宰驗壻屍。送女抵罪。於是女與諸少年皆入獄。女坐副。衆議罪有差。臨刑之前數月。女坐囚床。遣獄卒將其繡錦兜肚出售。得錢則與諸囚婦博。歡笑如平時。若是女者。真可謂別具肺腸者也。

審血手奇案

揚州邵伯鎮之某村。有符士駿者。少小時。卽不務正業。父母故後。家道中落。人咸以敗家子目之。娶妻某氏。素未聞其有淫行。二十年來。生子女四人。長子已成立。女亦適人。近且年逾四十矣。鎮有無賴子林懋。與符交甚密。一日。符誑林曰。余村於今夕放燈。盍往觀。余當薄具酒肴。以盡地主誼。林諾之。符所居之村。距鎮約里許。林抵暮往。村中並無放燈事。詰之。符謝曰。適誑吾兄。欲兄之駕臨耳。請今夜毋歸。聊作葉子戲。盡竟夕之歡。何如。林唯唯。如是者數日。林竟不言去。符妻以習見故。亦不迴避。目挑心逗。遂私焉。惟以村中耳目甚多。出入不便。因勸符移居邵伯鎮。於是林往來益密。久之。符偵悉其奸狀。大怒。操刀與鬪。經鄰人勸阻始散。由是符之庭。無林之跡矣。符仍恐防閑未周。復由鎮遷居於鄉。自以爲可無慮矣。而不知林於暗地往來如故。一夕。符妻謂其夫曰。族人某。今夜約君於某處小酌。君往否。符不知有他。遂行。是夕。風高月黑。覲面不能見人。道經城隍行宮。忽有要於路者。以刃擬其頸。符

急退。避道傍。適有深池。失足墮水中。挺刃者呼曰。爾敢上岸。我卽畢爾命。符聞知爲林。怒不可遏。卽匍匐登岸。徒手與之博。不勝。刃中要害。遂仆地死。林分其屍爲六塊。瘞諸廟後隙地。旋又移諸他處。次晨。鄉里間轟傳其事。邑宰飭快役捕林。獲之其家。又繫符妻以去。解送縣署。鞭林背五百。尙未供認。符之族人。亦具稟公請伸理。並獲有血手一。以爲鐵證。於是姦夫淫婦。始不敢狡賴。共吐真情。乃置諸法。

審箱屍奇案

某邑有女。在室與人私。情好甚篤。嫁有日矣。與所私者綢繆難捨。女突謂之曰。爾願作長久夫妻否。如願則三年中不得入我門。我終當設法歸爾。所私者允焉。女至夫家。事寡姑。曲盡婦道。遇姑有疾。衣不解帶。目不交睫。百計調護。待夫亦情意纏綿。歡然相得。隣里皆嘖嘖稱羨。咸頌某家有賢婦矣。女因無子。恒至各廟求子。適有盲者。推算星命。極有效驗。乃喚入。先以姑命令推。

盲者細述何年得子。何年喪夫。何年娶媳。媳最得力。纖悉俱合。姑神之末。乃言惜子不克久侍。賴媳賢。老年不致凍餒。姑媳皆懼。復令爲子推算。先述幼年行運。一一皆合。繼曰。此子十日內。有前生冤孽來尋。必遭橫死。萬難救免。其命也。夫再三惋惜而去。女謂姑曰。此雖術士妄語。然不可不防。於是姑媳二人。日夕守之。守三日。姑年老神衰。不復能支。倦極而睡。至三更後。忽聞刀杖擊格。几案翻擲之聲。女大呼曰。爾子發狂。持刀外出矣。請啟門。共往追之。姑乃起。燃炬奔追。黑暗中遙見其子披髮疾走。至村外溪河。湧身躍入。遺隻履於河畔。確係子物。大呼隣里。百計撈救子屍。數日不得。乃招魂設位。草草成服。女日夕悲啼。願以身殉。姑再三勸止。自後事姑益盡心力。藉縫紉以助甘旨。姑勸之改適。女誓死不貳。迨釋服。生計日蹙。姑又勸曰。家無擔石儲。我老不能力作。爾十指焉能供兩口。矢志不嫁。勢將俱斃。獨不爲我計耶。女始首肯。乃改嫁一少年。事媪亦極孝。遠近皆稱媪賴賢媳福。無子而有子矣。媪

亦頗自慰。少年卽女在室時所私者。合卺後。心怯前夫寢室。乃遷廚後小廂中。越年。媪弟在京貿易積資既富。携婦歸里。暫借姊屋居焉。居數日。其妻檢衣時。聞血腥。以告夫。夫乃詢姊。以甥死之由。心中狐疑不決。久之。腥愈甚。至夜半。密挖炕土。得一箱。啟視之。一屍支解在內。屍得土氣。且冤未伸。故不腐爛。仍掩之。不告姊。而鳴官。官往驗之。卽提女與少年審訊。二人堅不肯承。獄懸不決。媪亦深怨其弟多事。會新令至。悉其案。卽詣城隍祠。縛女與少年於兩柱。令吏伏案下。三鼓後。密遣人於殿後階側。嗚嗚作鬼聲。少年怯。謂女曰。冤鬼來矣。殊可懼。女叱曰。何所畏。數日卽歸。吏出錄其供。令據此。加以三木。少年始吐實。至是。女亦不敢置辯。蓋推命算士。乃女所賄。囑少年故善泅。是夜。約其將夫殺斃。掩於炕中。僞作發狂投水。遺履以堅媪信。計亦黠矣。臨刑時。女唾少年曰。無用子。吾目瞽。誤識爾也。

審浮屍奇案

吳橋趙某。賣布爲業。恒負布四方求售。或二三月始歸。年二十餘。家僅老母與妻。妻某氏。素惟放蕩。趙出貿易。某氏不安於室。日遊鄰里。姑勸之不聽。再言之。則怒目相向。反唇而稽。有許三者。邑中之紈袴子也。好與惡少爲伍。且喜漁色。不逞之徒。利其資而助之爲虐。一日。遇某氏於途。艷之。訪諸惡少。誰與相識者。或告之曰。此吾隣趙某之妻。其夫負販外出。故恒在我家游蕩。可以利誘之。許三喜諾。訂約而去。其人歸與妻謀。妻曰。是不難。使許僞爲我弟可也。俟某氏來。亦來。吾誇其多金以動之。某氏若不避。則事可成矣。其人乃告許三。盛服而往。某氏適至。見面欲避。隣妻以其弟告。且速之坐。某氏斜睨許。許故賣弄丰姿。漸通款曲。隣妻曰。吾弟非外人。可與嫂共話。吾具膳去矣。時某氏已心旌搖搖。不能自持。口言歸而身不動。隣妻窺知其意。避至他室。反閉其戶。許遂摟某氏求歡。某氏索服飾甚奢。許諾之。卽諧好事。甫畢。隣妻入室。某氏羞慚滿臉。無地至容。隣妻曰。母羞若欲不洩於人。須長與吾弟歡。

好。若不常來。吾將播揚其事。某氏亦諾之。由是許爲之易新衣。置首飾。頓改舊觀。姑詰其何來。則以母家對。姑大疑。訪得端倪。禁婦勿出。則罵雞。詈犬。終日攪擾不安。及趙歸。母告之。故立命休棄其婦。趙以母命難違。不得已與手書而逐之。某氏飲泣而去。無顏歸家。乃投許。許曰。今既長爲我婦。可不再受惡婆婆之氣矣。乃相處數月。供不應求。許復與惡少謀。僉曰。是非爾之真婦。可使之爲娼。得其夜度資。不但衣食無憂。致富亦不難也。許然之。逼某氏接客。至是某氏不敢不從。趙自出妻後。負氣而出。半載始歸。訪悉某氏已爲娼。潛往視之。某氏見趙。痛悔前非。淚落如珠。苦留趙宿。並還其手書。趙歸不敢告母。惟徒喚奈何而已。許聞是夜有客。而不知卽爲其本夫。次日往索資。某氏無以應。裸而撻之。遂以實告。許又與惡少謀曰。殆矣。手書已反其本夫。若以佔妻訟我。恐將不利。僉曰。彼乃經紀人。一時計不及此。必重來。俟其來時。吾儕伏於左右。羣起擊之。使懼而逃。從此可絕跡矣。許唯唯。未幾趙又至。甫

叩門。諸惡少從暗陬出毆之。乃詐死不動。許怯曰。我不過拒之而已。奈何置之死地。罪將在我。衆哄然而散。趙遍體鱗傷。歸又不敢告母。匍匐至河干。趁舟入隣邑。夜宿於某布行。其主驚問其故。趙誑以酒後與人鬪毆。既被人傷。亦復傷人。求暫避匿而調治之。行主爲之延醫診治。逾月傷愈。遂合夥販布口外。是時河干蘆葦中有一浮屍發現。羣乃報官相驗。檢得徧體鱗傷。似羣毆致斃者。面目腐敗。莫辨誰何。官爲盛殮緝兇。召屍親認領。趙母數日不見子歸。尋訪無着。或告以河干之屍。必子無疑。母信爲然。卽投縣告許三謀婦殺子狀。官啟棺使認。母亦難辨。因報仇心切。覩屍衣右肩有補綴處。謬曰。吾子布販也。其肩負布易破。吾以舊布補而白線縫之。是否請一驗而定。洗驗果然。卽提許三與諸惡少一鞫而伏。詳解省垣。許父哀其子。思有以援之。或謂之曰。此屍詐也。趙年少身短。屍則年老身長。雖已潰爛。然身旁有鬚一縷。可爲明證。父亟上控。使其子反供。遂復提審。游移無定。已逾年矣。趙獲利。遄

歸故里。母見之。喜懼交集。趙問故。母實告之。使子避匿。趙曰。不可。吾本無罪。若使許三問抵。則我咎不輕。且終身不能居故鄉。不如自首之爲愈也。遂投縣。自陳顛末。官大驚。卽偕往省垣。出許三於獄。科以和姦罪了案。

審黃牛奇案

河南汝寧縣陳致和。與胞弟陳致秋。務農爲業。同家共餐。致和性情寬和。戒殺放生。致秋則秉性殘忍。與兄絕相反。家有牝黃牛一頭。蓄已十餘年。年年生育。頗得其息。而牛已老羸。不能負重。致秋欲賣之屠家。以得其值。致和止之曰。牛雖畜產。貪生猶人。且在吾家多年。賴其苦力。亦復不少。脫令自死。亦當埋之。何忍生賣屠家而宰割耶。致秋堅執欲賣。兄弟因而反目。致秋遂創異爨之議。致和初不允。致秋日夕絮聒。致和乃不得已。邀集親族。書券分產。凡田業良沃者。悉以歸秋。其牛歸己名下。折銀十兩。親族見此。無不欽致和之高誼。而致秋則漠若不聞。自是兄弟雖共一宅。分東西而居。各食其食焉。

致和淡於情慾。而其妻宋氏。美而好淫。遂與叔私。愛情甚密。久之。嗔兄爲眼中釘。致秋遂與嫂商。欲毒斃之一夕。置毒食中。致和方欲舉箸。牛忽冲檻而出。突至席前。口作人言曰。嫂叔同謀。食中有毒。致和大驚。呼犬試之。犬立斃。恨甚。鳴之四鄰。連牛並食。詣訴邑宰。邑宰李公拘集審訊。致秋初猶抵賴。其牛忽又言曰。殺兄之賊。弑夫之婦。人人得而誅之。旣見青天。何容混賴耶。李意遂決。將宋氏一併重加嚴刑。二人遂招認。因奸謀殺情實。於是皆置諸法。致秋無子。其產仍屬致和。後牛老瘦斃。致和爲葬之東山。題其碑曰。義牛塚。

審黑驢奇案

保定清苑縣李氏女。嫁與張家莊張氏子爲室。相距百餘里。李女歸寧。月餘。張子跨小黑驢來迎。令妻騎驢。已則步行於後。路經某村。離家祇二十里。緣此村居民素多熟識。見之必來取笑。且驢亦熟識歸路。故令妻先行。至六七里許。有三叉歧路。過西卽張家莊大道。過東則任邱縣界。時有一少年。乃任

邱富豪劉某。控車自西轆轤而來。將張妻之驢。衝向任邱道上。相逼而行。及天色已晚。張妻心慌。向少年曰。此地離張家莊。尙有路幾何。少年曰。娘子誤矣。張家莊須向西而去。此是任邱大道。相距數十里。天晚難行。當爲娘子擇莊借宿。天明後。卽遣人送歸。何如。張妻無奈。勉強允從。至前莊。係劉之佃戶孔某家。備房安歇。其時適孔佃之女。亦新婚歸寧。孔謂女曰。今晚業主借宿。不能違命。汝當暫回夫家。候業主去後。再來迎汝。女從而歸。其房爲劉張共宿之所。劉之車夫。宿於房外。張之騎驢。繫于簷下。次日。日將午。不見啓戶。孔佃窺於窗隙。見兩屍在炕頭。俱在地。簷下繫驢亦失。孔佃與車夫戰慄莫名。佃乃密語車夫曰。汝家河南。離此甚遠。何不載彼衣物。速行逃竄。一經到官。則爾我身命難保矣。車夫從之。是晚。卽瘞兩屍於野。御車載物而遁。劉母見子久出不歸。杳無音耗。卽在任邱縣控御車夫。張子追妻不見。疑有別故。復又趕至清苑縣。控告其岳父母。縣官疑有冤。飭捕密訪。其時有嗜賭無賴之

郭三鬻驢於市。適與張供之驢。毛色相符。乃拘郭而盤詰之。始知郭三向與孔佃之女有私。孔女歸寧之日。郭從後窗潛入。見有二人共寢。疑孔女又有所私。一時氣忿。用刀殺之。並盜此驢而去。縣官復喚孔佃。根究屍之所在。親往起屍。及開土三尺。赫然一死人。乃禿頭之和尙也。復往下掘。方得兩屍。張冤既雪。劉死有蹤。而和尙之屍。又屬一層疑案。正懷疑間。天忽陰雨。官乃避雨古廟。寂無人跡。詢諸鄰保。曰。此庵向有師徒二僧。師因出外雲遊。徒亦他往矣。卽同鄰保往視僧屍。曰。此卽雲遊之僧也。遂嚴緝其徒。訪至河南歸德縣界。則徒已蓄髮娶妻。開一豆腐店爲生理矣。究其師死之由。供因所娶之婦。向與其師有姦。後婦又與己私通。師心懷不平。故共婦謀殺之。棄廟遠竄。遂成夫婦。官乃置二人於法。而以黑驢給張子領回也。

審蝸子奇案

金陵某氏子。頻年出外貿易。家惟一母一妻。母年老而盲。賴婦賢孝。藉鍼黹

以供甘旨。晨昏定省。無敢或虧。姑婦二人相依爲命。至秋子歸。母喜甚。命婦殺雞食之。中夜子忽暴亡。鄰里之人咸相驚異。鳴之官。官疑婦有私。及驗子屍。果然中毒。乃以嚴刑鞫婦。婦不勝其苦。遂誣服。問奸夫如誰。婦本無此事。況所識者又無多人。倉卒之間。無以應答。遂謬然以十郎對。十郎者某氏子在服之弟也。出門之時。曾托時往省母。并且代理家政。十郎年少誠實。以受托故。常至其家。經理一切。母與婦甚德之。今婦迫於嚴威。不得已以十郎塞責。官遂飛簽拘十郎。十郎見婦泣曰。嫂氏云何。婦亦泣曰。叔叔。……語未畢。嗚咽不能成聲。官拍案怒曰。奸夫淫婦。恬不知恥。在公堂之上。猶作此兒女子之醜態耶。於是不容十郎置詞。橫加鞭楚。死而復甦者屢。十郎難受酷刑。亦誣服。獄具論辟。行刑有日矣。時臬司某公廉明仁恕。慮囚至此。心甚疑之。向於幕友某甲。甲方與友圍棋。逸興遄非。全神貫注。含糊答曰。獄已具實。諒無冤曲。決之可也。婦與十郎遂坐大辟。是夜漏三下。甲將就寢。倏見一女

子從門隙入。披髮喋血。怒容滿面。戟指甲而罵曰。汝身膺監司上賓。不過略識之無。便謂精通申韓。坐享厚糈。草菅人命。某公以監司之尊。對於是案。不恥虛懷下問。思欲平反之。倘汝迎機開導。不難明不白之冤。而得一線生機也。奈汝以圍棋故。漫語應之。以致沉冤不能服雪。我死固不足惜。惟弑夫惡名。居之不甘。非向汝索命不可。言訖。向前直撲。甲駭汗如雨。長跪請曰。某罪應死。姑念我家有八旬之老母。可容我回家一別否。婦曰。念汝一點孝心。饒汝苟延一月。速歸家料理。遲則不及。言已。恨恨而去。甲毛髮悚然。明日謁居停。具以實告。亟辭歸里。及匝月。果卒。某公聞而大駭。乃微服親訪。詣某氏子家。見嫗備詢顛末。盲嫗泣曰。客乎。吾兒慘死。不得而知。所恨長官昏憤。不加詳察。使我賢婦冤沈海底。痛何如之。言時。流淚滿面。繼又曰。我與賢婦名雖姑媳。恩逾母女。終朝廝守。何由有私。乃遭嚴刑誣服。明正典刑。惜老婦殘年。瞽目不能爲賢婦申雪耳。公問十郎爲誰。嫗曰。此老婦之猶子也。吾兒出門。

之時。曾以家政相託。少年老成。橫遭摧殘。其殆前生之冤業乎。某公不勝歎息。暗忖食雞一事。甚爲奇怪。乃詭言腹中飢餓。出錢命代市一雞。倩人烹熟。卽置於其子所食之處。留心伺察。俄見熱氣上騰。葡萄架上一絲下縋。直入碗中。非竭目力。則不易察見。公知有異。取一醬飼犬。犬立斃。乃謂嫗曰。爾婦之冤。我能代伸。爾姑待之可也。嫗不解所謂。但合手稱謝而已。某公裏熟雞返署。檄原承審之縣令及各官。至告以是案之詳情。并命衙役呼一犬至前。飼以雞肉。登時斃命。遂令役往搜葡萄架。得一蝎。長四寸許。蓋所縋之絲。卽是物所吐出也。至是婦之冤情始白。且建坊以旌表焉。

審菜蟲奇案

滇省犍爲縣有一民婦。談者佚其姓名。情端淑。家道式微。夫出負販。婦藉十指作針黹。得錢以養姑焉。姑待之甚虐。小姑尤狡獪絕倫。常恃母凌之。婦不堪其苦。惟有飲泣而已。一日。因一細事起釁。小姑詞遁。不勝憤憤。陰以菜蟲

藥置粥中毒。嫂姑不知也。適腹中飢甚。向婦索食。婦以粥進。姑啜之。諸竅流血暴卒。小姑大駭。本欲毒嫂。反以毒母。私念事已如此。不如轉以誣嫂。衆咸信之。縛婦至官。拷掠備至。婦不勝鞭箠。屈打成招。案已定。處決有日矣。會舊令因事去官。新令甫抵任。翻閱舊牘。及至是案。頗疑其中有冤情。欲平反之。乃請於上憲。展期覆訊。研鞫兼旬。迄無端倪。乃令縛嫂與小姑。居諸城隍廟之一室中。又使隸役伏於室隅竊聽之。至夜半。萬籟俱寂。二女朦朧間。忽覺廟中木偶搖曳起立。直至室中。將拘人狀。小姑大驚曰。休矣。我知罪矣。粥中菜蟲藥。乃我置之。欲以毒嫂者。非毒母也。母自啜之。傷哉而死。隸以告令。遂釋婦而磔小姑於市。觀者無不稱快。蓋令初使隸役竊聽。冀有吐露之詞。後因無語吐露。又令隸役改扮木偶。乘夜深時。出以嚇之。不謂小兒女果然畏鬼。遂將真情畢吐焉。

審血驚奇案

中州某甲。幼失怙恃。年甫弱冠。娶妻某氏。端莊穩重。伉儷甚敦。甲有族叔某。在京貿易。因挾薄貲往依之。頗有盈獲。十年始歸。夫妻久別重逢。情好倍篤。及夜。滅燭登床。甲縱體入懷。忽狂叫一聲而亡。某氏大驚。急起床。燃火燭之。則見血流殷席。甲勢已闔割。不留餘蒂矣。某氏抱尸大哭。駭懼悲慟。莫知所以。次晨。親黨鄰舍。畢集。互相猜疑。以某氏帷薄素謹。何甲罹此慘變。乃共商議。不得不具狀訴官。官詢諸幕友。謂必因奸謀殺無疑。官亦頗然其說。窮詰某氏。備受拷掠。終不肯承。輾轉年餘。不能定讞。而某氏奄奄一息。尋將庾死獄中矣。會勾越有商先生者。年逾古稀。精申韓家言。老遊中州。善斷疑獄。官以厚幣聘至。與議此獄。商閱爰書。再四思量。固疑某氏冤枉。乃召之至。審其舉止。溫存。語言和婉。毫無凶悍之狀。益疑於如是。屏退左右。諭某氏母羞母恐。可將當日牀第情形。詳細備述。我當設法爲汝雪冤。某氏見商皤然老者。溫霽和藹。知非輕狂之輩。聞其言。愈加感激。稽顙有聲。遂將當日情形。自頭

至尾。縷述一通。商拈髯諦聽。忽然思得一法。諭令某氏歸房。赤身偃臥。母容含羞。乃購猪肉少許。切作人勢狀。以鐵鈎貫其中。命某媪將猪肉塞入某氏陰戶中。以覘其變。某媪如言試之。陰戶中果有一物。力啣猪肉。如魚之吞餌。然急拔出視之。其物長七寸許。遍體黃毛。四足修尾。酷類鼯鼯。始悟某甲變生意外。卽是物作祟也。見者無不咋舌稱異。商曰。此名血驚。爲陰精盛極所化。於是某氏之冤乃大白。

審毒龜奇案

馮某。維揚人家。稱小康。所蓄雞鴨犬豕。無故輒亡去。舉家咸稱怪事。然亦無可如何。姑聽之而已。一日。忽有江湖丐過其門。細覘其室。卒然問曰。君家蓄物頗多。亡去否。馮曰。然。汝何由知之。丐冷笑曰。君禍且不遠矣。不亟思預防之人。且難保。何況禽獸乎。馮駭問。汝有術可解否。丐曰。此妖物作祟。不知伎倆若何。試之可也。成功則當以錢十千緡。犒我作沽酒貲。否則一錢不需。馮

曰諾。丐命導其徧相宅中。至廚下。見水甕一具。瞪視良久。曰殆在是矣。乃命市猪肉一方。煮半熟。貫以鐵鈎。繩縛其端。纒柱上。將熟肉置水甕畔。人遙從壁隙窺之。果見甕下一物聞肉香探首出。張口遽啣猪肉。鈎挂喉際。負痛甚急。縮首欲遁。因繩纒柱上。猝不能脫。丐急出。將物縛住。令馮視之。狀如守宮。長寸有半。丐曰。此褪殼龜也。厥名曰蜥。因賀馮曰。君幸遇我。此物化未久。尙易制之。再過年餘。便能變化食人。卽非人力能制。君家將無噍類矣。馮大驚。因憶昔曾蓄一大龜。亡去年餘。殆卽是物。試以叩丐。丐曰。然。乃共覓其殼。果於貓竇中得之。蓋竇狹殼寬。龜偶入竇。如牴觸藩。猛力向前。遂褪殼化爲此物。丐謂此殼爲化骨妙棄。或去齧齒。或去癰疽腐骨。皆立效。可善藏之。爰索利刃。將此物剝爲肉泥。所有地上血跡。剗刮淨盡。盛以瓦缶。坎埋深山之中。笑謂馮曰。君可高枕無憂矣。馮大喜。欸以酒食。酬錢十千而去。越一年。馮家有長工。暑天畏熱。取門支牀。露宿庭中。明晨。竟體化爲水。惟髮獨存。馮大驚。

急訴於有司。驗其形跡。茫無端緒。馮坐是繫獄。而家業蕩然矣。忽前丐又來。見馮家狀甚蕭條。怪問馮妻。妻告之故。丐自批其頰曰。此我之過也。蓋當日殺此物時。曾有點血濺門上。以爲不足患。故未拭去。不謂竟波及長工。亟赴有司。爲馮訟寃。試取雞犬之屬。置門上血跡處。果俱化爲水。官賞丐之能。而出馮於獄。

百件奇案大觀 下編

百件奇案大觀 下編終

一〇四

上海图书馆藏书



A541 212 0009 1666B

民國十年三月初版

百件奇案大觀全二冊

定價洋五角



編輯者

廣文書局編輯所

印刷所

廣文書局

分售處

△總發行所四馬路懷遠里
▲分設北京漢口廣東支店
世界書局

總發行所上海

總店寶山路義品里
支店四馬路懷遠里

廣文書局



新正

世界書局